

НУЯНЬ ВИДЯЗ

Арселан
монь,
арселан...

*Келей ёвтнема, ёвтнемат, ёвтнеминеть
тешкст, статьят, рецензия*

16+

Нуянь Видяз

Арсеман, монь арсеман...

http://www.litres.ru/pages/biblio_book/?art=51851286

SelfPub; 2020

Аннотация

Это сборник произведений разного жанра: повесть, рассказы, миниатюры о природе (на эрзянском языке), публицистические статьи и заметки (на русском языке).

Содержание

Кавтосто вейке	4
Вант юрс	5
Вастовома	5
Преввелаякст	14
Терентий Тимофеевич	23
Казнеть эрсить эрва кодат...	29
Вандыде мейле	33
Арсят истя – лиси лиякс	36
Вана сон кодамо, Наталь!	43
Арsezесь топавтовсь	47
Уле ушодкс ды уле-уле пе	57
Кевень седей	70
Кода тетя пшкалить?	70
Кеминь, учить эйсэнь маней зорят...	81
Эсеть эйстэ а туят	90
Каня сельметь таргизь!	95
Азгондят, теке лытагай!	106
Весе ушодови эйкакшпингстэ	112
Конец ознакомительного фрагмента.	116

Кавтосто вейке

Кавто ёвтнемасто келей ёвтнема

Медаленть кавто ёнксонзо

Валмеревкс

Вант юрс

Васенце пелькс

Вастовома

Ардан ошсто. Бусонь меельце лотксема таркантень пачко-дезь, ванан, ахоли кедьсэнзэ, энялды озавтомс сэръс аволь сэрей, шожда, ёлганя рунго ава. Оршазь, вановтом вакска эзь юта, кизэкс. Лангсонзо нурька ожа сэняжа тюс, мерть, пачк невтиця ковтыне ды нурькине, кумажадо верьга, чопода-сэнь понкст. «Сэнь нимилиявне...» – ювк ютась пряван.

Урныгайсэнтъ ськамон, тарка уле. Мекс а саемс? Лоткинъ. Венствия вить кедем ды келес панжия кенкшентъ. «Озак!» – меринъ те шкастонть эсь пачкан, авастонтъ сельмень апак сае. Васня «пассажиркам» лашк путызе чевте озамо таркантень эседензэ стака, эрьва мезде пештязь коцтонъ юдманзо. Мейле венстизе озамо таркантъ икеле кундамонтень вить кедензэ ды керш пильгензэ кепедизе урныгаентень. Кепедизе-саизе юдманзо ды лоцьк озамсто путызе цитниця штадо кумажанзо лангс.

«Яла кись истямо кувакакс а карми марявомо, яла аволь ськамон... – кивчк ютась пряван мелесь. – Мекс а озавтомс ломанентъ?»

– Ды ков усксамак? – мизолдозь варштась чамазон ды пш-

кадсь тень вакссон ардыцясь, гайги вайгельсэнзэ пештизе урныгаенть потмонзо, матрызе ювк шкас моторонтъ кувака моронзо.

– Ков мерят... – паро ёжосо меринь каршонзо теке лувсонть, верьга вайгельть, кистэнтъ вановтом апак сае, монсь арсезевинь: «Тонь марто, ванан, дугай, а матедеват ветямкаеть вельксс, набоят, неяват, аволь тухмужатнестэ, аволь айшатнестэяк... Куш эрямосонтъ мезть а эрсить! Лия «сэтьмежасонтъ» зняро кежть-апарат кирдевкшнить, а онкставить мейсэяк».

Ардтано. Кись валаня, келей, цивтёрды чипаентъ каршо, теке парсте шлязь-нардазь сулика. Моторось урны, прок псакка лембине-чевтине таркасонзо стакачинь апак маря. Вайгельпе, омбоце, колмоце... Лови сынст выжнэзь пувиця вармась. Вальматнень тона ёнга сравтневсть ожо тюссост оймень кецневтиця товсюронь паксятне. Чиить ваксканок, мерят кияк тандавтынзе, пиже чама килейтне, пичинетне, калькуракштне... Таркань-таркань полавтнить сынст дюм пиже кукурузань гектартнэ. Юты тарго, мельганзо омбоце, ды теевить лангсост азорокс комбайнат, ушодыть урядамо тундонь-кизэнь перть, вейсэ Чипазонтъ марто, таштазентъ.

«Кить, кить, кить... Зяро эйстэст янсто саезь ведь потмова, ведь ланга ды коштка сравневицятнес? Кияк ёвтасы? А мода ланга чиицятнеде ледстямс стувтыть? Зяро ломанесь эскели, содавлия, эрямопингензэ перть эрва кодат? Лововить? Текенекс, кие-кодат? Вейкесь янсто а лисни, омбо-

цесь пель эрямопинге ардтни машинасо, поездсэ, колмоцесь
цюхаи пельтнеде верьга. Ней ламот арсезевсть ялго якамо-
донть. Икелень, лишмень шкатнень коряс, кадызе те «те-
венть», ловт, каназкадсь, секень вант, сядоксть. Ков те вети,
кевкстнемс а мезть. Кшнинь, кевень, модань... китнеде баш-
ка, улеть кить пайстомочинь, кенярксонь, салыщань...

Кить, кить, кить...»

Аламос аштезь мария икеле ёвтазь кевкстеманть:

– Ды ков усксамак? – сертизе ютксонок каштмолеманть,
лип варштась лангозон ды кевкстимим омбоцеде, черензэ
вить кедьсэнзэ витнезь, содавиксэкс теевезь вайгелесь.

– А содан. Ков теть эряви, ков капшат? Мон, тень, – ку-
дов, Пичелев, – аволь сеске, нурька каштто мейле ёвтыя тар-
канть лемензэ, ков кирдян ки. «Кевкстни, кевкстни, паряк, –
арсезевинь, – тензэ ёвтамат лемем ды тетялемемгак? Теке
кадовсь...» Теке басом визькс саимим те чаво, аволь превей
мельденть, янксезевинь. Мезень пежеть тейсь – пшкадсь ом-
боцеде?

– Вай, ды те монь чачома велем! Монгак тов... Яла ме-
рить, паз арась. Эно кие тонь кучинзить? – кецнезь ёвтызе
мелензэ асодавикс киялгам, вайгелезэ седеяк гайгезевсь, ве-
лявтывезе мизолдыця чаманзо монь ёнов, варштась икельган-
зо чиция кинь коцтонть лангс ды поладынзе валонзо: – Лис-
ни, минь ве велень. Истя? Тон кинь?

– Тень, кода теть меремс, мон эрян Пичелесэ аумок, ом-
бовелень мон, киньгак парсте а содан, – моторонть урноман-

зо изнязь, икелев, кинть лангс, ванозь ды ветямкаенть тей-тов черьказь, пижнезь топавтыя кевкстнициянть мелензэ. – Ве велень, мерема, эрицят, ансяк аволь ве велень ломанть.

Велькссэнь-икелень чамаваномастонть понгони вановтозон асодавикс аванть чамазо. Аволь келей, а мерят – ваканшка, седеяк – пешксе ковшка, седе курок – теине. Черензэ валдот. Коня верьга вейкетьстэ керязь. Кадык а тарказонзо, видькстан: а вечкан раужо черть-сельмть. Мекс? Содык азё... А содан ды сюрту! Кирксала чаманзо вечкевиксэкс теи эль-эль редявикс будолмине марто виде судозо. Сельмензэ – менельчелькст, сэнтъ-сэнтъ. Варшты лангозот – салат. Паро – преветь а човоргадыть. Мизолксозо – чуросто кинь аватнестэ истямо неят.

«Зяро, содамс, иензэ? – токимим мель, велькссэнь чамаваномантень салава варштнезь. – Неяви, байтяк, ведьгеменьшка улить, апак кавтолдо. Паряк, эскельдяськак трокскаст. Ялатеке, кадык таркань-таркань черькстнизь чамакиськензэ сормсевкстнэ, срадыть сынъ седеяк неявиксстэ сельмеужотнестэ, икелень вечкевиксчизэ эзь ола, нейгак вельмевтни вечкемань толкельнеть. Кемеви, нейгак цёратне сельмень конязь ваксканзо а ютнить. А сонсь, умок уш аволь од авась, ютни? Ну, те уш лия таркань кортамо, теде соды ансяк сонсь... Ды эрвась эйстэнек – эседензэ».

Чатьмонець, кистэнтъ вановтом апак сайне, ветямкаенть тей-тов велявтнезь, чаравтынъ колгансон мельпетнень: велень стакачитнеде, масторсонть теевикс зыянтнеде, певтеме

кенгелематнеде ды... аватнеде, нурька понксесэ, валаня ку-
мажа авадонтькак. Эзинь кирдеве, велявтыя прям ёнонзо ды
венствия келем, пшкадинь тензэ:

– Леметь а ёвтасак? – полашт варштынь икелень чамава-
номантень.

– Мекс а ёвтамс? Ёвтаса. Наталия, Наташа, велесэ ве-
се тень мерить велекс – Наталь, – ёвк чиремтизе прянзо
ды, лангозон эльканясто ванозь, ёвтызе истя сеedyстэ ней
вастневиця, куш кодамо кельсэ мазый леметь. Сеске теде
мейле педявтызе вановтонзо велев тердиця-капшиця кин-
тень. Тень пингстэ кепедизе вить штапо кедензэ кенкшенть
велькссэ кундамонтень. «Неяви, цёрась аволь кольнягайтне-
де, аволь кодамояк альгач. Пелемс эйстэдензэ а мезть... – ар-
сезевсь авась ускицядонзо. – Понгонинь весть, куломазон а
стувтови...»

– Леметь, мерема, ютавтови эрзянь кельс кода «тиринем».
Кодамо мазый! Кодамо покш зэме эйсэнзэ! – эзинь кардаво
содамс вакссон аштицядонть, таго кевкстия, куш тунь, торох
эзинь сода, мезекс те тень эряви. – А кудолеменк? Велесэ,
содат, кудолемесь – фамилия. Кинь улят?

– Вай, тон уш сюлынень пес бажат содамс, – марявсь, эзь
вечкеве Натальнень меельце кевкстемам, куш мезеяк берянь,
монь койсэ, эйсэнзэ арасель. Аламос чатьмонець, поладызе: –
Мон – Черькаень. Марсить истятнэде? – чатьмонець элес-
энзэ кирдевикс юдманзо седе ёнсто аравтомсто. – Черькаень
Лиза, Черькаень Шура, Черькаень Нюра... Киньгак сода эй-

стэст?

– Конат эрить Пичепесэ? Марсинь, кода эно... Аламонь велесэнтъ содан, сындест – марсинь. Минь, лисни, аволь васоло вейкеденек-вейкеденек эрятано, – ёвтыя мелем ды кекшнезь варштынъ икелень-велькссэнъ чамаваномантень. «Ули-арась мирдезэ? Кода арась, истямо мазый, вечкевикс – ды арась?» – бизмолк ютась пряудемган апак терде мелесь.

– Мон, маряви, пелензэ «биографиям» ёвтния. Тон – ве валгак, – мерсь ардыця ялгам ды лепштинзе якстерестэ эль артозь човине турванзо, вальмавантъ сыреждиця товсюронь паксятнень лангс ванозь. Саизе кедензэ вере кундамонть ды путызе юдманзо лангс. Мезть те лип шкастонть велясть пряудемсэнзэ, кодат мельть эвтсть-кашкасть, теде содась гайги вайгель верка авась ансяк сонсь.

– Теня, монь вельсоветэнь лемем Алексей. Алексей Андреевич. Кода? Туи? Мерить аламнеде лиякс – Алё, лиясто Лёня, – паро мельсэ, та-кода талнозь, прок од цёра, ёвтыя, кода монь «сёвныть». Чатьмонезевинь... Зяро тензэ? Монень марявсь, кевкстницянтъ коряс одан кеменьшка иеде. А вана кортавксонь, прянь ветямонь, веркачинь коряс сон, неявсь тень, – монь шкань. Валаня, човине ды лийканя вайгелезэ седеяк одкстомтсь.

Шкань-шкань теде-тонадо нурькинестэ пшкалезь, шкань-шкань каштмолезь, эзь марявоjak, кода ютынек буйкуншканть – кавто ёндо алкине пандосо пирязь эрзянь покш веленть – Валдайвеленть, мельганзо текекс кивчкадсь Пурна-

есь. Те аволь кода умонь эли пек умонь шкатнестэ, ардат аволь крандазсо эли бричкасо, мейсэ ардтнесь содавикс Чичиков ялгась. Ней комсьвейкееце пинге, вейсэнъ алтымань шка, а мезть вейкень омбоце ваксс путнемс.

Ютасть торох аламо, кавто кедень сурсо лововиця минутат, ды минь уш Пичелесэтяно. Икелень покш сюпав колхозонь конторанть, ней чаво покш кудонть, икелетяно. Чиресэнзэ кавто сыре рацяня килейтне важов вармань эрва лекствяксто, прок удомань пачка, састыне юхайть тарадост. Эрванъ эсензэ: кие арды, кие ливти, кие пейди-аварди, кие юхай... Улить истяткак, кить оймень апак полавтне рамсиль-микшнить. Лиядо сынст иля кевктне. Истя теи Пичелень прявт микшницяськак, Сеськень Валюш, икелень конторанть каршо «Чивалгома» лавкасонзо.

Ютынек пекстась удыця «конторанть» ды сеске пачкодинек велень ламо кудотнеде мазычисэнзэ явовикс кудонок икелев. Сон – минек, монь, куш... Зяро вийть, мелявкст путынь – теемс лембекс ды, аламошка пря шанан, васолдо неявиксэкс, – а онкставить мейсэяк. Секс – монь.

– Мон пачкодинь, вана кудонок, – яволявтынь, «чиема-нок» матразь, Натальнень. – Тонеть седе тов?

– Пароль... – эзизе прядо Наталь, мезе мериксэль, сонсь кургонь автезь, кода кортыть, вансь керш ёнов, монь сэне-ла-пижестэ аргозь кудонок лангс. .

Арсезевинь: учось, мезе мерян мон. – Чавонь кедть ялго-як молевлинь, молемасть тесэ... аволинь солакадо. Канстось

вана... кедьсант тарги.

Чарькодемс а стакаль, ков «менди» авась. Мон чатьмонезь нолдынь «ведьметнень», ды «айгором», кудонок ютазь, тусь кополсо. Эрьва кода поркснезь асфальтонь кись прыдовсь. Саинь витев чуваронь киванть, куруксто – кершев ды, вирь-киява ардозь, таго витев саезь, эртевинь Черькаень (Наталь ёвтызе) пирест келей, сэньстэ артозь кшнинь кенкшезэнзэ.

Авась ливчанясто панжизе кенкшкенть, кундась вить кедьсэнзэ икеленгзэ кундамкаентень ды капшазь валгссь урныгайтэнтъ. Саизе озамканть лангсто канстонзо. Ютась монь ёнов. Панжия кенкшкенть. Стясь каршон ды, ашо пензэ невтемга мизолдозь, лангозон ванозь, ёвтась тень ускоманзо кис суюкпря, тердимим инжекс. Панжизе пирекенкшенть ды стака юдманзо марто – кудов.

А содан мекс, теке кияк кармавтымим: вановтсо ильтия икельдень туиця, сэньсэ оршазь, штадо пря аванть.

Ансяк мурдынь ды ур-ур-ур туинь ардозь вирьга ютавтозь киванть кудов, мекшвелекс бизнэзевсть удемсормсевкс-сэнъ кодат-бути ачарькодевикс, седеень китнэвтиця, вечкевикс мельть: «Кие те сэнь сёлмо нармуннесь? Косто саевсь? Зяроце ие уш эрян Пичелесэ – неия васенцеде. Каня эзь сакшно теде икеле чачома велезэнзэ? Кодамо тувталось? Ко-да ды мезе илязо уле, эйсэнзэ мезе-бути ламотнень коряс лия, аёвтавикс, мазый, кецневтиця. Мезе? Содык азё!».

Содамс ломаненть, умок ёвтазь, – сэвема мартонзо пондо сал. Те кортыть истя – пондо. Икелень ним марто эринь ком-

сьветееде ламо иеть. Зняро, текенекс, сэвинь мартонзо пондот. Ды мезе? Эзия чарькоде. Паряк, моньгак эзимим панжо педес-пес. Ламонь кувалма, арсян, текеде явовстькак эрямонь кинек. Сон вейсэнэ эрямо пизэнек каладомадо дёкушкадокшнось, чевгекс коськекшнось, мон озакшнонь таблетка лангс – верем ламбаськадсь.

Эсь кор, эсь ойме ды рунговий, ёжот... Эрьвасо эрьва мезть. Эрьвасо Паз ды вакссонзо Идемевсь. Теньгак синтемест, маряви, а явсак лиятнеде. Теке марто мезе-бути ули эйсэнзэ, се, мезенть а мусак лиятнень потсто-лангсто. Умок редязь, пертьпельксэсь, весемесь, мезе Моданть лангсо ды мик Менельсэяк, вейкетьксчи а вечкить. Авейкеть пиземень байгинетне, авейкеть молекулатне, атомтне...

«Кодамо монень тев? Мекс педясть эйсэнэ сондензэ арсематне? Мезе теде – ардсь мартон ошсто, уския кудов? Ульнинь мартонзо час малава. Мезе тень эйтэ? Ульнинь ды – арасян! Ошов-ков эрьва ардомстон киньгак ды озавтан. Ардан, кортнян, кевкстнян, пеняцян тень-тонань лангс... Мезе берянесь?..

Вана сыречись а кадны, ормасонзо вансты эйсэнэ чинек-венек, эрьва косо, куш кудоскак иля совсе: пильгетне нузялгалеме кармасть, седеесь кирнявтнеме ушоли, лиясто пштикст педсить шоркаеме... А мон, айша, кие соды мезть нолдтнян колганозон... Мезеяк а теят: ормат, сыречи – те вейке, а арсематне, конатне ней куроудымизь, – те лия».

Эськан кортнезь, эзия редаяк, ютыя васня дринькаиця чу-

варонь, мельганзо ансяк лемезэ асфальтонь кинть ды васто-
винь сэньсэ мизолдыця, оймень оймавтниця кудом марто.
Лоткавтыя урныгаем, нолдынь эйстэнзэ пильген масторов.
Панжия пирявксонь келей кенкшенть, одс совинь урныгаез-
энь ды совавтыя латалов.

Преввелявкст

Кудосо эйсэнь учость ним Груня ды чокшнень, кадык а
маласольгак, ашо ванькс нардамосо копачазь ярсамопельть.
Дивансо, чевте-лембе таркинесэ, пря шны, венемтни рун-
гонзо, «оймси», атяка псаканок, прясто пильгс раужо Ну-
зай. Вадря эрямозо. Сонзэ а талновтыть а эрва кува молиця
войнатне, а миллиардонь питнесэ саламотне, а эсензэ икеле-
чизэ. Чеертне курок кармить сонзэ ноцкиеме пулодо. Мень
а рай раужкаень эрямозо? Сон аволь ськамонзо. Ломантнень
юткстояк ламот эрить сонзэкс. Пекест пешксеть, удома тар-
каст чевтетъ – кодамо тетъ лия уцяска? Мезекс содамс, кода-
мокс карми, икелечить?

– Теветь лиссть? Торох, весе яксевтитъ? – ютавтызе лан-
ган вановтонзо, шкань ютазь пшкадсь тень стуворонтъ перь-
ка котьмиця Груня. Допрок икелень, ловт, судом алов, путсь
ям вакан, чирезэнзэ комавтсь цитниця кшнинь пенч. Таргась
стувор потсто пеель ды каштмолезь печксесь розень, мекс-
бути мерить тензэ раужо, кши. Каня сон эрси истямо, рау-
жо? Тень теезь, таргась кельменькайстэ «чай» марто сули-

кань банка. Эйсэнзэ кирдеви арвотикшень веде. Панжизе ды нуртясь тень, «Алёнь кечинес», зяро эряви тюжа ведтенть. Сеске пештизе аравтозь кедьгенть лакиведьсэ. Човоризе. Качады, качады кода арвотикшесь! Истя кодамояк лавкань чай-тикше а качады.

– Пенчесь учи, ямоськак кшинть марто... Ярсак. Ужока, а таблеткат симить? – мель путсь, якась мирдензэ мельга ков-гак-зьярдож а капшиця Груня. Седе малав, ловт, улонзо алов, айгизе ям ваканонтъ, вельтизе, илязо кельме, чай кечинентъ. «Чоп вачоль, андома, ямозо илязо кельме...» – чийнесь Грунянь пряудемга мелявт-мелесь. Кудонь ломань, лиякс те авадонтъ а мереват, сонзэ эрямо масторозо кудось ды перьканзо кардазтнэ-пирявкстнэ.

– Сюк-сюк, – меринь, свалшкань таркасон озадо аштезь. Вить кедьсэнъ вакан чирестэ саия пенченть, керш кедьсэнъ – цяпласто кшипечть, ушодынь тувтамо, вачозь пекень пештямо. Ансяк пидезь ямось, вишкинестэ керsezь куяв сывель марто, марявсь тантейдежк тантейкс. Коршинь-амолинъ седеень витезь. Икелень путозь ваканонтъ чамдыя баксорсо.

Ярсынъ-теинь. Ёвтынъ анокстыцянтень сюкпря ды стинь таркастон. Озынь стуворонтъ вакссо диванонтень – тесэ монь, кода аволь умок лемдия, «ловномань залом». Теске удсетяножк нузякс, ялатеке вечкевикс, Нузяй марто. Тесэ ды диванонтъ песэ вальмалангось – таркат, косо кирдевить эрва кодамо лемень кулялопат, журналт, зярыя книгат... Те-чи калоньчи, почтань кандтнема-сравтнема чи. Секс истямо

сюпав «ловнома залом».

Саия ды кандыя, каштор-каштор, кулялопатнестэ вейкенть сельмень икелев. Ловныя икельксэкс путозь статьянтъ лемензэ. Эзь туге мелезэнь. Таго политикадо, таго кочкамотнеде, салыцятнеде, авань полавтницятнеде... Налкставсть. Од мезеяк арась. Сынст таркас сельмень икелев апак учо лиссь ошсто велев мартон ардыця, нурька понксесэ авась. Каня тердия мон сонзэ? Косто саевсть мизолдыця сэняжа сельмензэ?

«Вай, те мезень дюния? Мезень лецькай?!» – эль эзь пра кельпярстон марямга валтнэ. Превсэнъ челькень пес вельмесь сень чачозо, конань марто вейсэ ульнинек аволь чить, част, ансяк минутат. Весемезэ. Ды вант вана... кадсь мештезэнь, а кемевияк, истямо анардтневиця тешкс. Неия, кода сон, шождынестэ, кизэкс оршнезь, стядо аштесь кичиресэ ды ахолясь, кедензэ полавтнезь, ваксканзо «прянь-полдань синдезь» юхаиця урныгайтнень каршо. Мельсэнъ, кода кепедице ды путызе озамканть лангс юдманзо, озась, кода теевинек содавиксэкс, мезде кортынек. Ледсть мелезэнь сиянь баягинекс гайгиця вайгелезэ, сэнь сельмензэ, мизолксто панжозь човине турванзо.

Неия сэрсь алкине аванть мазыйстэ оршазь рунгонзо ды мик аламнеде тандадынь, зуйк мерсь седеем, пачкан югась чевте-вечкевикс лембе. Теке марто содавтымим мезе-бути визьксэнь кондымо; прок мезеяк салынь каршон аштиця Грунянь экшстэ эли теинь кодамояк лия пежеть.

...Мекс истя, мезде карминь, маряви, аймельгадомо? Мезе те, мезе мартон моли? Илязо уле... потсо пикстердиця вечкемань сятко! Илязо гувкаде эйстэнзэ... У-ух, авакай-тирякай! Кодат вечкемат васень нинть марто явомсто певтеме майсематнеде мейле? Эрдекстамот, сюдомат, сельведть, тандавтнемат... Мезть ансяк арасельть! Пазось эрвань вансто-зо эйстэст, эрвань. Вечкема... Сон ансяк книгатнесэ ды певтеме ламо фильматнесэ-косо неяви мазыйстэ цитниця, чиналсо пургсиця пазонь тештекс. Соват эрямонтень, чарько-дъсак: кодат ансяк нулгодькс, чопода тевть, ризкст-сельведть а лиснить эйстэнзэ!

А шумбрачись... Седеесь, кона кирдеви таблеткань неже-сэ, пильгень чулгсетематне... Кодат вечкемат... Те истя. Ансяк философсь истя мерекшнесь: «Ломаненть седейсэ меельцекс кулыть кавто ёжот: вечкемась ды кежень сазь авечкемась». Секскак кирьвали сон, сядо падежсэ шназь «ормась», иетнень, орматнень, лиятнень-мезтнень лангс апак вано, трокскаст эскелязь. Астяко поэтэсь мерекшнесь:

Нет, у седой реки
Всё то же буйство,
Всё та же быстрина и глубина...

Пурнынъ вийть ды вырновтынъ ушов стака килангов ветичя арсематнень, ледстнематнень эрямонь сеть ёнкстнеде, конатнесэ томбавкшнынъ а весть. Одс саия кедезэнь веёнов пу-

тозь кулялопанть. Таго седейколавкс – нусмакавтымим экологиядо покш, цифрадо пешксе статьясь, се, конасо ёвтневи, кода ваятано эсенек шукшс ды мезеяк тень каршо масторсонть, ловт, а тееви. А тееви модамасторсонтькак. Куш черть раздек виень аразденть куш мезеяк полавтомс паро ёнов! Мекс истямокс панизе-пидизе пазось ломаненть? Мекс? ... Пазось каня?

Омбоце покш, виев, седеяк превей сёрмадовксось – пертьпельксэнтъ ёждонзо ды мезе учи планетанть, учи икеле шкасто. Солыть Пелевеёнксонь океанонть эензэ. Модамасторонть лембезэ кепети иестэ иес. Теде солыть эйтне, домкалгадыть ды келейгадыть морятне-океантнэ. Ламо модат ды масторт вельтявить, сы шка, ведьсэ.

Ды таго теке: киньгак те а талновты, весенень буень а содыця, певтеме ялатеке. Те – орма, конадо ламодояк ламот а арсить. Натой а содытькак. Тунь а мелявтыть «менельсэ» эриця ломантнеяк. Сестэ эно мекс монень оймамо а максыть неть стакачитне? Мекс певтеме ламотнень те дух а мелявты?

Омбоце чистэ сыргинь кудазораванть кармавтоманзо топавтомо – лавкав кшинь рамамо. Пачкодинь, перькан ваннозь, неень ды умонь шкань эрямо таркатнеде, кудотнеде, вастовикс ломантнеде арсезь. Пачкодинь, стамбаро эскелязь, шкастонзо. Кшинь усксиця «газелесь» аштесь Сеськень Валюшонь озязонь пизэшка лавканзо икеле. «Паро, шкастонзо сын, пси кши саян!» – кивчкадсь прясон.

Ноцковтыя кенкшентъ ды эскельдинь аволь сэрей кенк-

шалксонть трокс. Нупальнесь тыц пешксе эрва кодамо ярса-мопельде. Мезе, кодат ярсамопельть ансяк арасть! Кува ансяк апак путне! Каня истят ульнесь микшнema таркатне эй-какшшкастон ды мейлеяк? Чаво лавсят... Ванность, арсесь мезе рамамс «ламо килограммань кандтница» ветешка од ды сыре ават. Косто неень шкасто муемс цёратнень? Мекс, кона ёнов а варштат, ават?

Эль кенеринь мельган кенкшенть пекстамо, мельган со-вась, мертв, судодо-судос эртевинь исень «ардыця ялгам» марто.

– Шумбрат! – сельмезэнзэ ванозь, кирнявтсь вельмиця кеняркс ёждонтъ мизолдыця турван ютксто шумбрачинь ар-семась.

Истямо апак сёрмадо лув уле: васенцекс шумбрат-парт ар-сезэ цёрась авантень, одось – сырентень; теке марто кедь мак-созо, васняк, сыресь одонтень, аволь мекевлангт, авась – цёр-рантень. Пшкадинь Натальнень, ды ёвтазенть марто совась мештезэнь лембе налнэ.

– Шумбрачи! – вастовсть вановтонок, ды маринь каршо налксиця сельме, рунгонзо видьстэ кирдиця Наталень пель-де: – Содат мезе... Мхы, тень, нолдык чумом – леметь сеске а ледстяви. Эрсинь...

– Алё, Алексей, – ледствия, талномадонть эль а коконозь, сурсон мештезэнь невтнезь, лемем Наталень чамас ванозь.

– Содат мезе, Терентий Тимофеевич, мирдем марто уль-несь кортамо: мартонк вастовомс, теевомс седе малавиксэкс.

Кода тон арсят? Кодаяк таргонь ютазь, – та-кода нильнезь ёвтынзе тердема валонзо Наталь. – Туи? – ноцковтызе ма-зыйстэ-валанясто судрязь штадо прынзо.

– Мекс а туи? Туи... Тердеманть кис, Наталь, суюконян, – талнозь, паряк, секс эрязкалезь, ёвтынь валон, кивчк варштынь кирьксала, сэнь сельме чамазонзо ды сеске виздезь комавтыя прям.

Наталь шаштсь полканть ваксс, кармась прынзо нолдазь ванномо суликатнень алга аравтнезь микшневиця ярсамотнень. Эскельдинь сонзэ вакска икелев. Пирявксонть тона ёно сонсь Валюш, аволь сэрей, раужо сельме, тюзала чама, эчке, аволь сыре аваломань. «Аволь эрзянь Валюшонь чамачачозо, – ютась, теке кияк кучизе, превган мелесь. – Тетянзо, аванзо? Косто сынь цопадизь те тусонть? Муик азё... Сталмонтькак кандтни...»

– Монень кавто кшикопшат, розень, лиякс – раужо, ды ашо, седе чевтине, меринь, кшинь лавканть вановтсон злыдардезь.

Путынь полиэтиленэнь юдмазон максозь рамавксон, пандыя, сокаринь зепсэнть, питнест ды лисинь ушов.

Лембе. Чись маней. Чипаесь, сэнь паксятнень азорост, пейдезь пейди. Кецневти виртнень-паксятнень, ломантнень. Мартон лавкав якиця шабратнень вазошка пинест Ашакай. Ёжом вадря, кайксэм седеяк.

Эскелян теке каладырь киванть мекев, кудов. Юткоськак тесэ ютамс кемень минутат. Пильгетне метрат ловить, а аш-

тить таркасост. Превтнеяк а содыть нузякскалемат. Ойм-сить ансяк удомсто. Вана нейгак: «Кодамо паз чачтызе те мазычинть? Аволь сэрей, седе виде карми – алкине. Валдо, аволь покш чама. Варштат веёндо – таташке. Вайгелезэяк... Чольдерди тундонь чудикерьксекс. Кеман, серьгеди моро – марясызь удыця пельтнеяк, ломантнеде а мезть кортамс – стувтсызь леместкак».

Течи, вановтом вакска эзь юта, оршазель Наталь лиякс. Ушонть псинзэ лангс апак вано, лангсонзо кувака пильге, валдо-якстере тюс понкст, нурька ожа икелень палянтъ полавтызе якстерть-мери, кувака ожа палясо. Мезть илязо кая ланганзо – молить, невтить рунгоь мазычинзэ. Варштат лангозонзо, – мерят, икелеть од тейтерь. Седеяк, зярдю несак сетнень ютксо, конатне майсевить велькска сталмодост. Кода истя вансты эсь прянзо? Мезде ярсни? Кодат тевть уски-сяворды астакалгадомо?

Неень шкасто, зярдю ярасамопельтне – кодат ансяк арасть лавкатнесэ! – сынсь эцить кургс, ды, текенень, чинек-венек озадо аштемасть панить эйсэнек тона пелев, косто мекев ки арась. Ванстомс эсь прянтъ – те неень эрямосонтъ ине, менелень сэрьсэ тев, сынсь мельс, Черькаень Наталень ёндю. Виев ломанесь, маряви. Виев сон потмовийсэ, ламо вий, неяви, коськана рунгосонзояк.

Вастымим кузтемпесэ ним, Груня. Лангсонзо ашо балягав, пиже, шожда коцтсто стазь кумажа видьга халат, прязо шержей, черензэ кирьга видьга вейкетъстэ керязь, яки шта-

допрят.

Мизолдозь лангозон ванозь, саизе кедьстэнь кши марто юдманть ды потазь совась кудыкелев. Кодат питнест копшат-нень, чевтетъ-аволь – эзь кевксте.

Совинь кардазс, сainya артомань кедьёнксон, артомапель марто кедьгетнень ды лисинь вальмалов. Озынь анокстазь нурька пильге эземнезэнь ды поладыя исяк ушодозь тевем – кудонок икельга пирявксонть одс артоманзо. Колмоце кизэ уш эскели, кода васенцеде сэньстэ ваднекшнинь цицинат-нень. Тедеде сainya мель артомс валдо-пижесэ, лиякс ёвтазь, салатонь тюссо.

Аргынь чикуншкасто саезь чокшнес, меельце пелев ниль-тякадокшнынь. Пелинь пиземеде, секс истя панинь. Чинь-чоп кодат ансяк мельть эзимизь содавтне! Арсинь банянь пу-томадо, яжинь превть, кода ды косто ускомс ярсамопель ту-вотненень, поремадо башка, сын а содыть мезеяк, порить... ансяк кенерть максомо. Модамартнеяк, кадовсь аламо, тар-гамат. Кая лововить зяро-кодат мельть чинзэ перть пивтсть-ютасть удемган?

Велень эрицянтъ тевензэ кая содыть пе? А вечкевкшны вейкесь: сын, кудонь-пирень мелявкстнэ, эрва кодат тевтне, ушодксто саезь пес чарыть-велить тутманть перька. Поремс, поремс, поремс... Сон свал улезэ пешксе. Тень туртов топав-товить ламодояк ламо мелявкстне. Ламот эрицятнестэ эрить пекень эрямосо. Сонзэ ловить эрямонь зэмекс. Лия, мельс туиця ёнкстонзо, а содыть, содамскак мелест арась. Оймесь

чаво, пештемс сонзэ – те сынст а мелявтовты, а токши, а риз-
нэвти..

Шкань-шкань лиснесь, сакшнось икелень кичиресэ кеден-
зэ кепсиця аволь сэрей-покш авась, кодамокс ды кода васен-
цеде неекшня Черькаень Наталень. Икелеяк некшня прев-
сэнь сонзэ алкине, тейтерькс ёлганя рунгонзо. Ней неия ды
мекс-бути аравтыя од килей ваксс. Кода теевемс мартонзо
седе содавиксэкс, кортнемс мартонзо седейшкава? Кода истя
– кода? Инжекс тердимизь? Тердимизь... Мезе теть невак?
Истя мерськак: «Таргонь ютазь». Чинть эзизе ёвта. Исяк уль-
несь куншкачи. Те, лиси, учома таргонь перть. Учома, ков
эно молят!

«Теня, саты течис!» – марямга путынь пе тевезэнь, стинь
эземнестэнь, варштынь топавтозь тевем лангс, пурнын-са-
инь цёкон, лия кедьёнксон ды совинь мартост кардазс. Вajo-
дема чим прядовсь. Манеель. Шканзо коряс лембель. Макссь
теемс, кецневтимим, аволь аламо.

Терентий Тимофеевич

Ошов ардтнемадон мейле ютасть зярыя чить. Кудос сов-
синь чуросто. Котьминь, кода сеедьстэ эрси, кардазсо: лак-
синь-инзэдинь, рисовинь, чувтосто керсинь-пильсинь ма-
зыльминеть, някат. Теинь вечкевикс, оймень витиця тевть.
Эзинь стувтне ниле пильге лангсо чийницятнедеяк. Мезть
кортамс, чуросто кие а соды, кодамо тевсэ сюлав велень эри-

цясь?

Апак учо панжовсь, чикорк мерсь, кудыкельде кардазс аволь покш-келей лазонь кенкшесь, ды стясь кенкшалкс лангс аволь сэрей, аволь човиньяк, кудюютконь халатсонзо Груня.

– Прядыть теветь, совак, ломань тенек сась! – пшкадсь тень кузтемпестэ цийница вайгельсэнзэ ды, потазь, глянка-дизе мельганзо кенкшенть.

«Мезе, кодамо ломань, косто, кона ёндо? – чиезь чийсть кевкстемань валтнэ пряудемган кедьёнксон таркаваст пут-немстэ. – Совама, эно кода...»

Полавтынь кудыкеле кардазьютконь колошан, панжия стака кудокенкшенть, совинь кудос. Удалцькудонь вальманть каршо стуворнэнтэ экшсэ озадо аштесь, учось, васняк сельмезэнь каятотсь, шержей пря атя. Эскельдинь малав. Асодавиксэсь ливчянасто, аволь атякс стясь. Венстизе, лангзон кецница вановтсо ванозь, панжадо кедькоморонзо. Тень теия монгак. Вейкенек-вейкенек лангс ванозь, нардевстэ лепштинок кеденек.

– Терентий Тимофеевич. Седеем витьсак, карминдерят тень мереме Тимофеевичень таркас – Теряй леляй. Литературань лемем, текенекс, – Дораень Теряй, – ёвтынзе лемензэ ды кода меремс тензэ апак учонь инжесь. «Теряй леляй, литературань лем... «Истят валт велесэ эрямстон кинь кургстояк эзинь марсе, те мезе-бути од...», – арсезевинь атянтъ кунсолозь.

– Монь лемдекшнимизь, – эзинь кирдеве – пейдезевинь, – Лёхакс, Алексеекс, мерить тень мекс-бути Алё, – ёвтыя пш-калема лемем каршон стядо аштиця аволь сэрей, моньш-кан, коськана рунго, аволь монь кондямо парь эчке, атян-тень. Явовсть «ояксчинь» кедькоморонок. Шаштынь эземне ды озынь Теряй лелянь каршо.

Сельмензэ атянть валдо-сэнтъ. Судозо аволь псакань, ку-вака, куншкасо будолмине марто. Алце турвазо верцентъ ко-ряс аламнеде эчке, ды теде кургозо мизолдомсто-пейдемстэ тееви авечкевиксэкс. Секс правты мель кургонзо кирдемс пекстазь. Икеле валдо-чопода, ней умок уш конясто човоньс сияждыця шержей черензэ наразь нурькинестэ. Ансяк ко-нянзо вельксэс кадозь веёнов судрязь черьпакшке.

Инжесь оршазь атякс, лангсонзо куштазь пона, нурька ожа, понкс потс нолдазь панар, раужо, вадрясто, секень вант, керяват, вадяшазь понкст. Сон аволь эчке ловажавтнеде, секс, веёндо ванозь, мерят, од цёра. Лиякс кодаяк, куш аволь келей лавтовонзо лангсо кандтни сизьгемень ветеде ламо иеть. Вана истямокс васенцеде стясь сельмень икелев, совась содавиксэнъ тетрадезень Теряй лелям, эли, кода книгасон-зо, – Дораень Теряй.

Кортазевинек кода-бути апак учо книгадо-ловномадо. Монень маряви, сюлмавксокс тенень ульнестъ стуворонок вакссо диванось – вень ютавтнема таркам – ды пряпесэн-зэ вальмалангось: лангсост кода понгсь вачказь кулялопат-не, журналтнэ, книгатне. Сынъ, бешом, ульнестъ ушоджсокс

кортамонь кувтантень. Мелезэнь тусть, кадовсть превезэнь Терентий Тимофеевичень кой-кона мелензэ.

– Истяткак валт пачкоolestь пилезэнь: мезе, келя, икелень шкатне – галань толга ды раужо навсемкай ведь. Мезень сёрмадомат? Кодамо, келя, превей, васов тердиця-неиця литература? Кодат сёрмадейть? – мерекшнесь вейке «ламонь содыцясь». Сон сестэ истят чаво валтнэнь каршо, ёвтнеманзо коряс, мизолдсь ды тей-тов черькась прясонзо. Талномадонть, мельсэнь, сайсь вальмалангсто кодамо понгсь книга, панжизе ды сеске путызе мекев. Стакасто лекстясь. Озась седе ёнсто.

А стакаль чарькодемс, икелень аштесь превей, ламонь содыця, текенень, сэтьме, чевте кор, седеень мариця ломань. Истятнэде ней ютксонок, масторсонть, косо теевить ламо чопода, тандавтница тевть, сави видькстамс, ламо а мерят.

– Э-э-э... Сёрмадсть, ды кода сёрмадсть! Жуковский, Вяземский, Пушкин, Лермонтов, Толстой Лев, Чехов Антон, Белинский... А Гомер? А стяко литературань ветицятне XIX пингень лемдизь рузонь литературань сырнень пингекс. Келей эскелькст Советэнь властенъ пигстэ теезельть эрзянь литературасонть.

Кулдуркаев Яков, Раптанов Тимофей, Куторкин Андрей, Коломасов Василий, Радаев Василий, Абрамов Кузьма, Ганчин Анатолий, Сульдина Аня, Люлякина Серафима, Рябова Людмила... – каштанчинь кирдезь Теряй лелям ледстинзе эрзянь ды рузонь ине сёрмадейтнень лемест ды сэрдькс-

энь марязь поладызе кортамонзо неень тевтнеде. – Истят лемть, истят литературат, культурань истят тѣкшт ды сеске, прок менельстэ прась, книгадонть копорьѣнт велявтома. Састь тень кувалма кевкстемат: кие «чумось» ды козонь пачкоди книганть полавтыця, электрониканть, вельде ломанесь. Мезеяк, бешом, лия а теят: наукань ды техникань прогресс. Ломантнень ютксо конѣвсо сюлмавкстне полавтовсть телевизорсо, интернетсэ, смартфонсо ды ляя-лия электроникасо. Ялатеке ламонь кувалма тевесь аволь «техникасонть» – ломаньсэнтъ. Мекс, каня кие а мери ловномо электрононь книгат?

Ёгань Теряй ёвтызе мелензэ, стакасто лекстясь, оймась.

– Виде теяк, Интернетэсь, «чумодо» явозь, – ине вий. Ансяк муеви се, кона ёвтасы, ков вети сон, киберэсь, ды ков пачтасы ломанень сыментъ? – поладынь Теряй лелянь, псистэ кортыщанть, валонзо, ёвтыя мелем, максынь питне икеле ёвтазь сювань сталмо валтнэнень.

Терентий Тимофеевич кунсолось, чатьмонсь. Кончтнесь сэнь сельмензэ, ваннось лангозонок, мезе икелензэ. Апак учо пстылязевсь ды пшкадсь тенек, кудонь азортнэнень:

– Алексей ды Груня, вандычинь ютазь садо миненек, учотано. Варштасынк, кода лексетяно, мезде-кода мелявтано, – мерсь шержей пря инжесь таркастонзо эрязасто стямсто. Витизе рунгонзо ды поладынзе валонзо: – Зяроце ие уш эрятанно Пичелесэ, вейкенек-вейкенек седе малавикстэ а содатано. Кецнян, содамо карминь: кудосонк явиде мель, тарка кни-

гантень. Ней истямось чуродояк чуросто вастневи... Ловно-манть каршо кшнинь пирявкст стявтсть. Лездыть тенень эри-цятнеяк. Ярмактнень, сюлавчинть, пешксе пекенть мельга правтомась кравтызь книганть ломаненть ойместэ.

– Сюкпря, Теряй леляй, паро валот ды тердемаат кис, сатано апак кавтолдо, – мерсь каршо Груня, коник чиресэ аштезь, эсензэ ды монь пельде.

– Натой тон, Груня, ды мон – чачомань коряс ве велень, аволь тестэнь, те шкас эзинек вастневе. Ильведьксэнтъ витема, – янксезь, теке марто муст-мустант пейдезь, ёвтызе мелензэ атясь лисемадо икеле, кенкш каршо аштезь. – Те ошсо ломантне явовить векедест-вейкедест, велесэ лият тевтне.

Атясь кортась мартонок, лангозонок ванозь, верьга вайгельть. Чарькодия куруксто: пилензэ Терентий Тимофеевичень аволь одонь – камажат. Абунгалемс а савкшны, иензэ... эскелить кавксоньгементнес.

...Урядыя книгатнеде-мезтнеде коникем. Седе ламотне кельгсть вальмалангс. Штавтъя тавадксонтъ. Толонь вельмевтеме, ловномо эзинь карма. Копачинь вельксэнтъ. Конинь сельмень. Удомам ёмась. Прок тандадсь. Теке мерят, кезэрень гректнень Морфий пазост допрок стувтымим.

Кувать майсевтсть эйсэнь моданть лангсо эрямонь зэмедентъ кевкстематне, кирдевьсть превсэнъ Теряй лелянь марто вастовоманок, мартонзо кортнематне. Ютасть икельганчинь-чоп эвтэзь-чаразь теезь тевтнеде ледстнематне. Поладксокс тенст ледсь мелезэнь лавкасо Наталень неемазо.

Гайгезевсь седеень пачк ютыця сонзэ вайгелезэ, ды, okayни-ки, ваязь ваинь удомань вечкевикс эркентень. Удынь чинзэ лисемс, прок кулозь.

Истя вана чи мельга чи, ков мельга ков, кеняркст-ризкст, ды а редясак, кода прядовить неть читне-ковтне, прядови эрямопингесь. Мезекс сакшны ломанесь моданть лангс, мезень кис, мезень тееме? Ломанесь... А мон? Маней валске чипаенть лисеманзо лангс кецнезь ваном? Аволь апештевиця пекень пештямо? Арась, арась! Ансяк аволь тень кис.

Казнеть эрсить эрва кодат...

Сыргозинь. Велень а куш а каш. Груня эйтэнь «васоло», икеле кудосо, уды. Курок сонгак сти.

«Мезестэ ушодомс?» – сельмень апак панжо содавтымим кевкстемась. «Мезть кевкстнят? Каня а содат? – кевкстимим модапотмонь кодамо-бути эчке, гавзара-казямо вайгель. – Васняк, умок содат, пештямат зобняст, симдемаат кардазсо оркиицятнень. Ветямат лугалангс, сюлмамаат цицигас, симдемаат вазтнэнь, каяма, седе котност, саразтнэнень...»

– Теня, саты теть лужалемс! Аволь боярат, – панжинь каракшон, меринь марямга эстенъ ды брикстядия лангстон кизэнь шожда вельксэнтъ пильгепес.

Стинь. Витния мельган таркам. Нарынь. Ютынъ шлямо-нардамо. Кельме веднесэ шлия-ёрвалдыя чамам, пансия, теке тенстьсэ тенсия, рунгостон кадовикс удомам. Оршнинь

ды лисинь кардазов.

«Аштека, аштека! А тон, атя, арсик, мезе кармат каземе Натальнень вандыде мейле?» – апак учо сыця те мельденть тарск теинь. Теяк. Мекс ансяк – Натальнень? Тувталось ко-дамо? Чачома чизэ? Аволь. Эно мекс сонензэ? Казьсынек, мезе раматано, Груня марто кавонек пельде. А мезе, бути Наталь лемс анокстамс мазыйстэ сёрмадозь-артозь картыне? Ды стихсэ... Кецневтьса, кеман! Мекс – таго куронымим те-ке кевкстемась – ансяк Наталь лемс? Кода тень лангс ваномо карми Теряй лелям? Содама текенекс тувталонтъ, мезень кувалма сёрмадозь-кучозь. Арась-арась – те а казне, те ня-кинесэ пакшань налксема.

Монсь казнетнеде истя меревлинь: ве таркасо ботамот, эвтемат! А вечкеви тень те, кадык кезэрень, коесь. Мекс – а содан. Паряк, нузякчись пилыгть путни? Иетнеяк... Мезекс, видеяк? Казне – те максомс лезэ эли теемс мезеяк вечкевикс, важов, мезеяк эрявикс малавиксэть туртов. Сонзэ теемга эряви тувтал: мертяно, урьвакстома-мирденень лисема, нурькинетэ – поल्याмо. Цётавкс чачома чи – комсеце, колоньгеменце... Весемеде ламо кецневтить ломантне вейкест-вейкест Од иень вастома читнетэ ды, секень вант, аволь седе аламо, Авань чистэ. Аватне, видькстамо, казненъ каземанъ кувалт цёратненъ коряс седе дошузт. Пшкадема Грунянень. Сон кол неть тевтнесэ, профессор...

Каземанъ коесь ульнесь советгнэнь пингстэяк, ансяк казнетненъ покш – чист, питнет ульнесь ламоксть лиятат.

Аволь кода ней: урныгай – аволь ве миллионь питнесэ, квартира, кудо – кемень этажонь сэрсьсэ, яхта, океансо усия... Истямо казнень макснемадо эзь марсее, онстояк эзь некшневе. Сестэяк, содави, эрва мезть вастневсть, ялатеке урныгайс-кудос эзть пачколе. Мик версетнеяк. Казнекс ульнесть лембе, арсема марто сёрмине, почта вельде кучневикс картыне, патефон, книга, паро, тантей чине ведень флакон, вечкевиксэть туртов мазыйстэ викшнезь пачине. Шкань ютазь паро казнекс лововкшность радиолатне. Максневсть, теде башка, Ленинэнь ды Сталинэнь лемсэ Казнень лауреатонь лемть. Мезе ульнесь – ульнесь. А велявтсак. Се, ней уш умонь, эрямостонть аламо мезе ванстовсь. Аволь весементь, ламо мезенть – ванстомаль.

А бути Натальнень паро книга рамамс? Кинь, кодамо авторонь? Косто? Сави ошов ардтнемс. Тевесь эно малавгак аволь тень эйсэ. Мезе ашти монень тов пансемась! Ловныця-аволь? Вана мезде арсема! Казьсак казнеть, сон лангозонзо а варштыяк, усксееме карми. Мезекс те? Ютазь шкатнестэ книгась ульнесь, кадык аволь эрванень, паро казнекс. Ютазь шкатнестэ, ней...

Ней? Ней... Седееть нуваргады: чинь куншкава тол мартаояк а муят ловномань вечкиця. Ков сынь ёмасть? Мезе мартаост теевсь? Мейсэ тувталось? Визькс – книгась велявтсь... шукшокс. Чумо телевидениясь? Истя, сави меремс, улияк. Астяко теицязо, кона чарькодекшнине, мезес ветясы ломаненть сонзэ «эйдезэ», те самай «сэняжа сельмесь», кудосон-

зо куломазонзо телевизор эзь кирде.

Кода полавтовсь шкась ды эрямость!

Чикуншка. Кудыкеле каинь пильгстэнь эрва чинь рудазов колошан, совинь тутмань пештямо. Груня икеле кудосо уютюгсо вадяши пельскоське муськемат. Озынь каршонзо диванс. Кевкстеманть, конадо арсинь валскень перть, кирдинь превсэнь, максыя вадяшицянтень.

– Теня, содат мезе, вандыде мейле тердимизь инжекс. Чавонь кедть, эйкакшоськак соды, а яксить. Икеле тень кувалма превть яжамс эзь савкшно. Суликанть зепс ды – чийть! Ней, истя молиндерят, ламот ловтадызь кевень пингень ломанекс. Ютась шкась, зярдю «валютакс» ульнесь пельлитрась. Ёвтык, мезе анокстама тенек, мезе саема?

– Шожда меремс, саема... – аламос лоткась тей-тов яксевтемеде пси уютюгонтъ Груня, путызе икелензэ «стядо», кепедизе вановтонзо мирдензэ лангс ды ёвтызе мелензэ: – Мертяно, мезеяк оршамопельтнестэ... Содама, кодамо покшолмань, кодамо тусонь, кодамо лувонь-модань, коцтонь... Марят? Эли сайсынек кедьгень масторонтъ. Мезть эйсэнзэ ансяк арасть! Мезе каземс? Кечинень-кечине – ракамонь тевть. Истя ансяк калмамсто явшекшнить. Текенень, мольтяно аволь кодамояк юбилейс. А мезть майсевемс. Ардтнят валске Валюшонь лавкав ды рамат покш-ламбамо арбуз. Седе вадря казне, зяро иля вешне, а муят, – превс путымим псидентъ кудонь панжадо сиве халатсонзо Груня, поладызе тевензэ.

– Виде! Виде – седе а ков! – серьгединь, теке эйкакш, кецнезь. – Кода тень эзь панжово те – превс эзь саеве? Кие эзизе марсе валмеревксэнтъ: аватнень черест кувакат, а превест... Вана теть нурькинеть! Сень кис яла пря шнатано: минь, минь, цёратне, превейть, докат! Эйстэст вейкенень те-як эзь чулгово – рамамс казнекс арбуз! – шныя, аноколинъ «сырнень валонзо» кис Грунянь турвас паламс.

Вандыде мейле

Э-эх! А шказо уш ниленть трокс кирнявтсь, ашолгадсь. Саты теть сэставтнемс-мерькамс ацамотнень. Зюнзютне учить. Атякшоськак астяко кырьгапарензэ разди, ледстни эседензэ ды зярс чувто лангсо авакштонзо.

Штавтъя лангстон лембе, истямо вечкевикс вельксэнтъ, ацые таркам ды карминь пурнамо-сэрнямо, эсь мельган якомо.

Ушодовсь од, лия чи. Менелень прявтось эрьвела, мизолдыця вановтсо келейстэ вансь вальматнева ды валдонь кельсэнзэ тердсь мартонзо эскелямо, вейсэнъ тевень тееме, тердсь ушов.

Стясь тона кудосо, пурны ацавксонзо, састыне козкстни, васты маней чинть Груняк. Лисинь ушов, саинь латалдо койме ды ютынъ кудонок удало модамарень пирезэнек. Шказо, таргамат. Чемень сэвинзе лопасть, касомасть касовсь.

Коймем сялгавтан куракштонть аламнеде потазь – иля-

зо керяво модарне. Ванан текенекс илязо мараво, вельтяво, илязо кадово модас. Аволь покшт тедеде модамартне. А кона ёндо улемс вадрякс, пиземеть ульнестъ – чеменесь сэвинзе. Кенярдт, яла мерить, сенень, мезе ули, мезе пазось макссь.

Койдем ды кедень-пильгень содыть тевест, пугыть вий – таргить кастозентъ. Велявтови ундокс, омбоце... кеменце... Капши, а кадови чувицятнеде пряудемеськак. Эйсэнзэ мельтне кашкить-эвтить пизэсэ коткудавокс. Сынь оймамо а содыть. Ансяк удомсто энгамить. А содыть оймамо Черькайтнеде арсематнеяк. Неемс Наталень, кортнемс Теряй лелянь марто. Сон неявсь, зярдэ сакшнось тенек, валонь кирдиця ломанекс, редия теньгак – сон келейстэ ды домкасто арсиця, ламо ловныця. Те истякак содави. Апак ловно, ламонь апак сода аволь романти, ёвтнеминяк аволь сёрмадо.

Вастовтано – карман седеяк парсте содамонзо. Натальдеяк... Кие сон, кодат содамочинзэ? Косо, мезекс важдось пенсияв туемадо икеле? Вастовтано – теевтяно, кемеве, седе малавиксэкс. Кие, кода-мезе, те весе... Неемс, варштамс сэнь эрьке сельмезэнзэ, марямс... Вана мезе превстэнь а лисни, вана мезе монень эряви васняк, вана мезе уски, терди тензэ...

Арсеzewинь лия покш тевде – одс вельтямс, кадык зярс аберяньстэ ашти, кудонок, путомс неень шкань лато, келькшэ вельтязь жестень.

Сась Груня. Комась, кундась мода лангс ливтезь модамартнень кочкамо ды ведрас веркасто кайсеме. Тоцк-тоцк,

байк-байк... – маряви кайсемстэст велень келес. Эрязкалезь, теке сараз поксари моданть кавто кедьсэ, иляст кадово модартне модас. Нетькстнэнь ёртни-вырновтни ве таркас.

Тевенек моли увсо. Зярдю пешкедсть кедьгетне – эйстэст кеменьшка, – сялгия коймем ды ушодынь латалов кандтне-мест. Явномадост мейле – видьмекс, ярсамс, ракшатненень – нолдасынек кавто лазсто стазь олаккева мацтс. Молевкс кавто пешксе ведра марто вейке, омбоце, колмоце... Зяроксть илязо уле, превтне тевест содасызь, пильгетнеде-кедтнеде косяк а кадовить – мезде ансяк а арсить!

«...Течи прыдомальть, ансяк, пелян, а прыдовить, вете соткат, аволь аламо. Кажось эно апокш, ванды «сяворд-сынек». Мейле рунготнень ёрвалдомат. Сисем часос эряви улемс анокок. «Вастовтано Черькайтнень марто, мейле мезе, мезе седе тов? Мезе, мезеяк арась...» – бизмолдсть прысон кевкстематне.

«Кодамо панар оршан? Маряви, раужо кикс марто ашонтъ, моли тень. Туить куштаз, валдо тюс понкстнэяк. А Груня кода пурны-сэрни?» – нурысть, полавтневсть ловажань кудосост мельтне стака ведрам марто тей-тов яксемстэ.

Таго саия кедезэнь койменедентъ, таго карминь сявтнеме нетькстнэнь, бажинь таргамс модамартнень лангс, неявост ды ён улезэ сынст кочкамс. Кочкак, Груня, поксаряк, пештгть кедьгетнень! Нетъ ансяк валт, сонзэ эзь саво кармавнемс, тейсь тевензэ те аволь веркатнестэ ломанесь – кияк мельганзо а кенери. Сави шнамс, кол авась пирень-кудонъ пень а со-

дыця тевтнесэ. Варма, а мерят, аволь эрызкалицятнеде, тень
лангс апак вано, тевенть теи куроцсто ды вадрясто.

Котьминек чикуншкас. Ярсынек-теинек, лекстинек ды,
сиземанть изнязь, поладынек ушодозенть. Телень перть те-
де-тонадо байтяк эряви, эряви эстенек, ошсо эриця эйкакшт-
ненень, аволь аламо эряви кардосо кирдевицятнененьгак...

Пе путынек модамарень таргамонь мелявкстнэнень чи-
валгоманть якстерьгадома шкастонзо. Чипаесь, кода минь-
гак, арсесь оймсемадо, арсесь шка максомс экшела менель-
сэнтъ сюрокс мендявозь сэняжа муворонтень. Сиземадонть
эскелинек Груня марто стамбаро, пильгень ускозь, ялатеке
мелень витезь – теинек чинзэ перть ламо. Молинек чатьмо-
незь. Кортасть кисэнек мацт лангс кандтнезь ведратне. Пи-
земеде пелемс а сави, пеледест ламо модаренек лато алот.

Арсят истя – лиси лиякс

Кудосо шлинек-ёрвалдынек чаманок-кеденек, нардтни-
нек шлямонькаенть ваксс эскес понгавтозь чевте нардамо-
сонть. Груня шкань апак ёмавтне кундась стуворонь анок-
стамо. Мон оршнинь кудокс ды озынь коникс, оймсемань
вельть вечкиця Нузый ваксс, а истяко чеертне кудыкельга-ку-
ва чийнить ошконсо ды промкст ютавтнить. Педявтыя вано-
втом кулялопасо теде икеле муезь, мелезэнь туиця статьян-
тень. Ловнан, лексян-пувсян.

Вальматнень копачинзе вецана сув. Букватне «вишккал-

гадсть». Кармась сундерьгадомо. Груня вельмевтсь тол.

Эзинь кенере ловномонзо статьям, апак учо вить бокас шоркадимим истямо пштикс, эль эзинь серьгеде пиже-ожо вайгельсэ. «Те таго мезень апкаж?! Истямо сэрдькс весть-как эзимим куроле...» – чиезь ютась пярван.

Кеминь, юты. Стинь. Тарказост, вальмалангс, путынь книган-газетан, ация таркам. Мадинь кунст. Венстинь пильген. Зярс-бути сэрдьксэсь аламнеде потакшнось. Таго ушодсь карамо. Велявтынь пеке лангс, оймамо эзь арсе. Видькстынь, мезе мартон, Грунянень.

– Теня, ютак медичкантиень, паряк, ёвты мезеяк, потмом палозь палы, – сэрдьксэнтъ лепштязь, сеедьстэ лексезь меринь ним туртов. Сон мезеяк эзь мере, каясь мезе-бути ланганзо ды лиссь. Кадовинь ськамон. Пштикстнэ седеяк сеедьстэ, капшазь кундасть сялгонеме. Мезе, кодамо тюниха марто ансяк а вастоват эрямосонтъ!

Аволь ламо шкань ютазь келейстэ панжовсь кенкшесь, ды мельга-мельцек совасть велень докторонок Сюватонь Галя, азоравадонть аламнеде сэрей, мельганзо Груня. Галя шумбрактнесь, ютась коникем ваксс, стядо аштезь, таргась юдминестэнзэ градусник ды максызе монень – путомс кавалалов.

– Ней ёвтнек, кода ёжот марят, мезе марто теевсь-лиссь. Иля эрязкале, – мерсь чевте вайгельсэ, чамазон апак кончтне ванозь, прок сельмень ёвтасызь, мезе эйзэнь педясь.

Мон ёвтния, кода-косо маряви сэрдьксэсь, зярдю ушо-

довсь, кона таркасонть, куролимем-арась икеле. Ормань очо-бицям кунсолось, вансь лангозом. Шканзо ютазь таргия гра-дусникенть ды венствия учицянтень. Кандызе сельмензэ ма-лав, арсезевсь ды «кецневтимим» «аппендицит» содавикс валсонть.

– Эряви тердемс капшакай, – ёвтынзе неть валтнэнь, шаштсь аламнеде коникем эйстэ, таргизе юдминестэнзэ те-лефононзо ды кочкизе эрявикс номерэнтъ.

Монень капшакаень тердемасть, мельганзо каштось пач-кодсть кода-бути гонгиязь ды теке каськасто. Пеень сускозь, кониксэнтъ велявтнезь-менчевезь кирдинь акирдевикс сэ-редьксэнтъ. Груня ды Галя озасть, аштеть чатьмонезь.

«Кода монтемень Груня карми прядомост модамартнень – превс а саеви. Мезе ськамонзо теи? Э-э-э, цёра, тонь допрок бриндат новольсть . Тонь каня тоначив сайтъ эйсэть? Сат. Сат, ды стамбарнэ-стамбарнэ прядсынк. Э-ка! Муить мезде мелявтомс.

...Ванды сисем чассо вастовома Наталь марто. Васто-винь... Кортнинь-калякинъ Терентий Тимофеевич мартояк. Учинь, учинь те часонть! Учовсь... А стяко кортыть: ар-сят истя – лиси лиякс. Аволь весе эрямосонть ашти эседеть, аволь. Ней зярдо, кода вастовтано? М-хы, пря яжат... Ули телефон. Ули... А косто мусак номерэст? Кодаяк муса...»

...Совасть, талай чокшнентъ лангс апак вано, нупален-тень, козонь путымизь, ашо халатсо, сэрей, ведьгеменьшка иесэ цёра-врач ды почаня пря, эчкела рунго, мизолксонь каз-

ниця од тейтерне, медсзорнэ. Содылинь: те цёрась – Пичелень, фамилиязо Пивцайкин, лемезэ Пётр Иванович.

– Ну, кодат теветь, откерь? Кода ёжот марят, мезе лангс пеняцят? – лангозон ванозь, пшкадсь тень пеедькшнезь, паро ёжосо, ормань очобицясь. Саизе кедьстэнь градусникенть, педявтызе вановтонзо лангозонзо.

– Теня, – лавшо вайгельсэ ушодынь ёвтнеме ормадон...

Докторось кайсевтимим. Чатьмонезь токшизе-вадяшизе пекеалксом ды мерсь ваксонзо аштиця ашо кавшаня прячерь медсзорнэнтень:

– Нейке, шкань апак усксе, анокстынк операцияс, – ды кавонест вейкест-вейкест мельга лиссть нупальстэнть.

Кадовинь съкамон, эсь мелень-арсеман марто. Марсинь, келя, те керсемась-стамось аволь стакатнеде, шождасто тееви ушодыця хирургонтеньгак. Ялатеке эрва мезть лиснить те «шождакэнть» ютавтомстоэяк. Косто а косто саевсь ды совась потмозон кодамо-бути ризкс-навола ёжо. Эрва мезть лисснить... «А! Мезе ули – се ули!» – оймавтнинь эсь прям, кшувавтнинь превстэнь чопода мельтнень.

Сёлмон нолдтнинь стяко.

Нупальтнева валскень ютамо шка. Кой. Састыне панжовсь сэрей ашо кенкшесь, ды совасть тенек Пётр Иванович ды, кода свал, медсзорось. Эскельдясть коникем пес.

– Ну, кода ёжот марят, откерь? – коникем вакссо стядо аштезь, пеедькшнезь пшкадсь тень исень валсонзо ормань менстицям. Керявксом эзизе варшта. Саизе венстезь кедьст-

энь градусникенть ды ютавтызэ ланганзо вановтонзо. – Ниле чинь ютазь, цёра, улят кудосо. Сырькаеть вакссо кармат ёж-от витнеме. Ансяк, ва, ирдезт иля яжа, стакат иля кепсе, ве таркасо мель путт а аштемс, яксек састыне.

Кунсолынь ды арсинь: кодамо паро профессия кочкакш-нось Пичелень те эрзянь цёрась. Кода а суюконямс сырнень кедензэ кис?

Лездыцязо та-мекс лиссь. Палатантень апак учо кадови-нек кавонек. Пётр Иванович озась каршон чаво коникенть чирес ды, кумажанзо лангс нежедезь, лангозон пштистэ ванозь, апак учо кортазевсь допрок лиядо.

– Ванды, содат, таргочи, кочкамот. Кинь кис кармат вайгелеть максомо? – мизолдозь, валаня кемевикс вайгельсэ кевк-стимим Пивцайкин. Чатьмонезевсь. Учось, мезе ёвтан.

– Кода кинь? А мезть кортамс, Мештевень, содазь... А мезе? – кониксэнтъ кунст мадезь аштезь, апак арсе ёвтыя, мезе кирдевсь превсэнь. – Сондензэ, лиянь, а кинь.

– Мон мезеяк а мерян, эрванть эсензэ арсеманзо... А мекс аволь Прявтонть кис? Вант, кода мелеть, ансяк монь сядловтсамак, а максындерясак вайгелеть Прявтонть кис. Мерить тень: эзик топавто мерезенть, тень кис, парсте содат, а шнатадызь. Ярмакт тень-сень рамамс а максыть... – нусманясто мерсь мезе мериксэль каршон аштицясь.

Кунсолынь прявт врачонтъ, ды потсон киштсть, невтнестъ сюрост ды пижнестъ ошонь келес вардолевкст: оно, оно кода прявтт пурныть, оно кода масторсонок ветявить тевтне –

кенгелезь, тандавтнезь, салазь, секс варявт зепенекак...

Саимим седейскириця, нусманя ёжо.

Сеске Пётр Иванович ламо содыцясто, превей, шназь цё-расто теевсь чаво пряпотмо, сэрсь-чамас дёкуш, татора рунго ломанекс. Лангозонзо ванозь, нусмакадынь, мелем, коймезе тензэ ёвтамс, – ёмась. Жаль тень марявсь.

Ломанесь, кадык аволь эрвьась, улезэ ломанекс, валдо мельде пешксе пря, ванькс ойме ломанекс, аволь налкшкекс кинь-бути кедьсэ. Яказо сон эрямонь китнева прянь кепедезь, каштанчинь содазь, азорокс. Улевельгак истя...

Кавто-колмо чинь ютазь пшкадинь Пётр Ивановичнень – седе курок, шкадо икеле, нолдавлимым кудов. Грунянь кедьсэ, меринь, прядса пичксемань курсам. Колмоце чистэ, чикуншка малава, okayники, вановтом вастовсь сэнь-пиже коня, валдо сельме кудом марто. Лу-уньк мерсь седеем кенярксонь ёжодонть. Исень нусманядонть эзь кадово челькинеяк.

Кудо, кадык сон аволь монь лемс сёрмадстозь, путынь эй-зэнзэ зняро, зяро сонзэ неень питнезэ. Ялатеке сон кемевикс лато: эжди цят якшамотнеде, вансты юргозь-вешкезь пувиця ушонь ды эрямонь бурятнеде.

– Я! Те тон кода шкадо икеле? – эль кенеринь мельган кудонь стака кенкшенть пекстамо, вастымым Грунянь човине-сэрей вайгелезэ, эскельдьясь каршон. – Мерекшнить, вандыде мейле нолдатадызь.

– Истя уш лиссь, – эзинь карма ёвтнеме, кода-мезе ульнесь педес-пес.

Оршнинь одс, ды совинек Груня марто икеле кудос, озынек чевте диванс.

– Кода прят марят? Ёнсто ютась керсемась-стамось? Лия мезеяк эзь керя? – педькшнезь кевкстимим Груня. Озась седе ёнсто, нежедизе кутьмерензэ диванонь удалксонтень, учось.

– Теня, эзинь маря, эряви варштамс... – Грунякс педькшнезь меринь кевкстнеманзо каршо.

Ёвтния педес, кода ульнесь.

– Пекеть вачсь? Ярсамо кармат? Оно мезе, – кепедизе, «оно»-ть лангс лепштызь, вайгелензэ, юхадсь вить кедьсэнзэ мештензэ икелльга Груня, – гайневтсь Терентий Тимофеевич. Кевкстнесь, мекс эзинек сакшно тенст, кода кортазель, инжес. Ёвтыя тувталонтъ. Истямо мель ёвтась: садо, зярдо савтадо. Максые телефононь номерэнзэ. Оно, вальмалангсо конёвпанкскесэнтъ. Мусак. Икелест, видькстан, чумо теинь – эзинь гайневте асамодонок, – паро кулянь ёвтыцясь сурсонзо нардынзе турванзо, стакасто, виень путозь витемтизе рунгонзо ды ютась удалце кудов.

– Паро, колмо-ниле чинь ютазь варштатано, – меринь дивансто стямсто ды эскельдинь Груня мельга. Мария, пекем каравсь, ледстни пештемадо. Озынь свалшкань озамо тарказон стувор экшс. Учан.

«Эрь эно, стяко пелинь, стяко мелявтынъ, – арсезевинь, – лиссь кортазентъ коряс, читне ансяк аламнеде шаштовсть. Мезе теде полавтовсь? Сюк пазонтень, Везувий одс эзь вель-

ме, Равгак пелеве ёнов чудеме а арси. Колмо-ниле чинь ютазь ультаю Черькаень кедьсэ. Содамс, кода оршазь вастсамизь Наталь? Пароль, кода сестэ, васенцеде вастовомстонок, – нурька пильге, чопода-сэнъ човине коцтонь понкст, сэняжа тюз, теке менелесь, ожавтомо ковтыне. Те уш кода пазось мери. Иненть а кармавтсак».

Вана сон кодамо, Наталь!

Пичепев од содавиксэнек туртов молемадонок икеле лиссь вана кодамо тев.

Шумбрачинь кудосто самодон мейле омбоце чистэ, чикуншкань ютазь, совась тенек апак учонь, киде зярдоак арсезьгак арасель, инже – Вельдяень Ирина, Пичелень библиотекаресь, свал ков-бути капшиця, верка, теке штере авась. Паряк, секс истямо коськанаяк? Оршамотне лыйнить лангсонзо.

– Шумбратадо, Паксютт! – ансяк кенерсь совамо, кияксто потолокс пештизе кудопотмонтъ жойница ванькс вайгельсэнзэ. – Кода эрятадо-аштетядо? Тевенк молить, мезе лангскак а пеняцятадо?

Аванть аволь книгань-библиотекань кевкстнемадонзо васня талакадынек. Те кода истя, кевкстни – теке Сюватонь Галя медичкась. Меремс мезеяк эзинек мере. «Пеняцямодо» чаво валонзо ютавтынек пиле вакска.

Иринанень ведьгеменьшка. Минек коряс од ломань. Сы-

ретнень юткс а совавтсак. Седеяк – лангс ванозь. Кода-мокс иляк лово, эрязачинзэ лангс ванозь сявадыть ламонь сельмть. Моли – мельганзо чиезь а кенерят. Секс сонензэ пароль улемс аволь книгань азоравакс, а сёрмань-кулялопань кандтницякс. «Кунсолока, атя, паряк, неень библиотекарт-ненень улемаяк Иринань кондымокс?! Чийнемс, а мезть ну-всемс книгатнень марто чаво нупальсэнтъ».

– Ютак икелев. Озак, прякан варчить, – сэрей-сорныця вайгельсэнзэ тердизе Груня совицянтъ. Оно, невтсь панжадо коморсонзо стуворонтъ, вакссонзо чаво эземнентъ ёнов.

– Арась, арась, Груня патяй! Сюкпря, шам арась, – эряз-калезь, прысонзо сеедытэ чертязь, мештензэ икеле сееды-тэ ахолязь, ёвтызе мелензэ Ирина, кудокуншкасо стядо аш-тезь. – Мон вана «Валдо» журналонь од номер тенк кандынь. Кеман, Алё лелянь кецявтса! Сон велесэнек весемеде ви-ев книгань «порицясь». Номерсэнтъ ёвтневи минек велень авадо – Черькаень Натальде. Тынь, Груня патяй ды Алё ле-ляй, аволь минек велень, содасынк сонзэ, а маняван, чультъ-чальть. Секс ловносынк сёрмадовксонтъ паро мельсэ.

Мон аватнень юткс, мезде-кода кортазевсть, эзинь эцне, чатьмонежь аштинь стувор экшсэ ды састыне «варчинь» Грунянь модамарень истямо кавшаня ды чевте-тантей пан-жакаензэ. Сускат – келеть нильсак.

Иринань кургсто марязь кавто валтнэде, кецнемадонть эль эзинь кирнявто потолокс, кивчкадсь, ютась пачкан мезе-бу-ти ёндолонь кондымо. Мон стинь, автордыа аванть кедь-

стэ журналонтъ ды озынь «ловнома тарказон», мелень ванозь, монськак а содан мезде пелезь, панжия ансяк кандозь «Валдонть». Вельксэзэ-лангозо теезь мазыйстэ, кода кортыть, танстень марязь, – ваны лангозот сэняжа-ашо тусонь фотокувостонтъ эрзякс оршазь мазый – сельметь а саевить – ава. Нолдык чумом, «Валдо», талай эзитинь сайне кедезэнь.

Варштынъ ёнкскентень, кинь сёрмадовкост номерсэнтъ. Кузьмин Григорий, Тимофеев Алексей, Пахомов Яков, Василий Ёндо, Радай Васильев... Содавикст, содавикст! Те сынъ 30-це иетнестэ ульнестъ юронъ путыцякс эрзянь литературантень, сынъ теекшнизь ашождыне васень эскелькстнэнь. Кода эно, вечкевикс сёрмадеень! Кода а содамс ды а вечкемс масторонтъ келес содавикс «Кенгелькай» романонтъ авторонзо Колмомасовонь? Сисемеце классо тонавтнемстэ эрвантень, кие мезеяк а истя ёвтыль, раксезь-згилязь мерилинек «кенгелькай». О-ох, кода те умок ульнесь, кода васов кадовсть сеть шкатне!

Пачкодинь, лемтнень ды сёрмадовкстнэнь ваннозь, Сыреськина Раиса видьс. Те сон кодызе-сёрмадызе «Авань мазычи» фотокуво марто покш статьянтъ. Сонзэ кедьчелькесь! Панжия невтевикс ёнкскентъ ды сельмень эртевсть... Наталень ёнкскентъ келесэ покш фотопортретс!

Ловныя Раянь шкинемань видевоксэнзэ весть лекстызь, ютынъ омбоцеде. Берянь мезеяк а мерят, парсте, сюпав кельсэ викшнизэ Раюш статьянзо. Ве таркасонть – покш абзац – ёвтневи откерьаванть рунгонь-чамань мазычидензэ: «...рун-

гозо – а эрва тейтернень сави шнамс пря – тундонь од килей, вановгозо – пицезь пицесы седееть, чамасонзо мизолк-сось сияждозь сияжды...».

Видестэ, петнявксень пес видестэ невтизе. Ансяк теде, видькстан, ловномс монень а мезть. Неия, латынень кельсэ мерезь, в натуре, аволь кодамояк алкинепитнень артовкссто. Аволь ансяк неия, вана нейгак гайгезь гайги пилесэнь сыр-нень вайгелезэ.

Таркань ютазь сёрмадыцясь ёвтни Наталень ошсо ды велесэ кудуютконь, кардазонь ды пирень ламодояк ламо мельявкстонзо. Уски сынст, кода сёрмады Рая-Раиса, – лишмекс. Те уш, монень маряви, вельть казямосто – лишмекс. Эряволь седе чевтинестэ. Теке марто журналось теньсэ невтизе аволь ансяк Наталень мазычинзэ, невтизе тевень вечкиця-теиця ломанекс. Сонзэ кунсолыть цёрань тевтнеяк, кунсолыть узересь, инксэсь, пилась, мушкорось... Тевтеме, диван лангсо лужалемань эрямось – аволь сонзэ, те аволь эрямо.

Эзия редя, зярдо выр-выр тусь Ирина, мельганзо састыне панжизе кенкшенть, лиссь эмежпирев Груня, мон яла а явован Иринань истямо тень питней казнензэ марто.

Пекстыя журналонтъ. Кедьсэнь сонзэ кирдезь, сельмень конязь, зярс-бути аштинь озадо таркасон. Арсинь. Арсинь ловнозденть, статьянтъ кельдензэ, Натальде... Ней сатано тенст аволь кода веёндонь ломантъ, а кода талай шкань содыцяст. Тенень лездасть «Валдо» журналось ды Вельдяень

Ирина.

Арсезесь топавтовсь

Сынек шкастонзо, кода кортазель Терентий Тимофеевич марто. Чокшнень сисем чассо лоткавтыя «автом» кавтов панжтневиця, тень аламнеде содавикс, кшнинь келей кенкшенть икелев.

– Вана тесэ, пиже пацясо копачазь неть пичетнень ало, эрить-нежедить Теряй атя ды низэ Наталь, – меринь мексбути салава талнозь Грунянень, ансяк лисинек урныгайстонть. – Тесэ сынь, прок письмарт, ютавтнить лембе шкатнень. Те таргавкшны чадыковсто ожоковс. Тунда сыть, пизэ пурныть, экшенди – стить, кода нармунть, сёлмо лангс ды сайт ки лембе ёнов, ошов.

Панжия потмо ёндо тулодозь сэнь кенкшенть, ды совинек азортнэнь «масторс». Сыргинек пиренть кувалт видьстэ таргавозь, лугасо вельтязь янганть кудынес-ёнов. Пирест пелеве ёно, песэнзэ, – ветешка-котошка иесэ пичинеть. Удалост, сеске пиренть тона ёно, прок тетяст-аваст, – свал пиже, пондакш пря сыредаяк сыре пичеть. Сынь ванстыть пелеве-ёнксонь кежей варматнеде аволь ансяк эйдест, од пичинетнень, ванстыть пиренть куншкасо оно се чувтонь кудынес-энтэ эрицятненьгак, Черькайтнень.

Яннэнтъ, кува Груня марто эскелятано мельцек-мельцек, кавто ёндо пирить васня инзеень тусто куракшт, мельгаст –

шукшторовт, торлат. Сынст удалга, керш ёнга, – аволь сыре умарьчувтт. Сынст мазылгавтыть ожола, пиже, якстере умарть. Те тешкс азортнэнь, васняк, кеман, Наталень, мелявксчидест. Ве аэрявикс, зыян тикшине а неят – косо лездезь, косо мелень путозь чупонезь-изазь.

– Неят?.. – састо эскелязь, тей-тов ваннозь, марямга, прок экскурссиянь ветница, пшкадинь Грунянень, ахолдынь керш кедьсэнь умарьчувттнэнь пелев.

Умарьков. Ушосонтъ општ. Маней. Менелень сэньштесь, маряви, салавине, эль марямга гайги. А неят пельпакшке. А рестыця пси, а экше, кодамо эрси те шкастонть. А сеськетъ, а карвот. Певтеме мазычи ды медьарвонь чине кошт. Лексят лексевлитъ! «Мекс, мекс тенек свал мезеяк ды а саты, мекс свал маряви тесь-тонась аламо, мекс а содатано пештявома? Валдочама чить, сэрей вирть, келей паксят, сэнь сельме лейть-эрькетъ, морят-океант, пандот... Весе сын минек... Эряк, кецнек, морак! Мезе тенек невак эряви? Топодтяно-арась зярдоак?» – арсезевинь, седеем колавсь тувталтомо.

– Неян, – нурька чатьмонемадо мейле прась Грунянь кургсто, теке пупордясь, валось. Мелезэ кортамс арасель – ваннось, мезе касы-кастови перьканзо, велявтнесь прянзо тейтов.

Терентий Тимофеевич ды низэ Наталь аштеть озадо кузтепень лато ало. Неявсь, учость. Редимизь, стясть, лангозенок ванозь ды эсь ютковаст мезде-бути кортазь.

– Шумбрачи, шумбрачи! – каятотсь човор, азортнэнь ды минек пельде.

Теряй лелям венстизе вить кедензэ монень, паро мельсэ лепштинек кедьлапанок, сэнь сельмесэнзэ цитнесть кеняркс ёжонь сяткинеть. Нолдызе кедем ды парсте марямга, прок ушман, яволявтсь:

– Мон тынк кедьсэ ульнинь. Секскак содавтневемс а мезть, Теряй атянь содасынк. Тыненк Груня марто мон саван лелякс, секс тынсь чарькодьсынк, кода тень пшкалемс. Покштянь-сырькаень койтнень эрявить ванстомс, – паро ёжосо, мизолдозь, макссь тенек, одтнэненень сонзэ коряс, превть

– А мон – Черькаень Наталь, тетялемем – Викторовна. Саван кавоненк туртов, кода маринь, кирдажокс, – пеедькш-незь содавтызе эсь прынзо азоравась, теке мель путсь невтемс ашо, цитница вейкеть пеензэ. – Паро, теевинек, okay-ники, седе малавиксэкс. Мон те велень, ансяк пенсияс туюмазон сакшнынь аволь сеедьстэ, сакшнынь авань варштамо. Шкань ютазь ... Ну, те уш лия моро.

– Монень чачома чистэнь саезь мерить Груня. Минь Теряй лелянь марто ве велень, аволь Пичелень. Мелявксонок, кода велень эрицятнень весень: ботатано чоподасто чоподас, пе а содатано, кудосо-кардазсо, лембе шкатнестэ – пиресэ. Лисни, минь Алё марто – алкуксонь велень эрицят, – чамдызе потмонзо ним, кузтемпесэ Наталень каршо аштезь.

Колмо-ниле валт ёвтынь эседень, Алё-Алексейде. А вечкеви, зярдю тень истя пшкадить. Мекс – а содан.

– Мезе, адыдо кудос, – апак учо каятотсь, шаштынзе веёнов содавтомадо кортамотнень, Теряй лелянь чевте, вечкевикс вайгелезэ. Корты сэтьместэ, кунсолыцянзо марязь. Бути кодамояк пелькстамо, ушоды кортамо, мезенть редия невак икеле вастовомстонок, псистэ ды кемевтезь, а поты, мерезенть а полавтсы.

– Ужо, атя, иля капшавто, – сорновтызе раужосто артозь прячерензэ, сертизе поланзо азоравась, – адыдо васня, инжень, невтьса тенк, пря шнан, «эмежуманок».

Теряй лелям мезеяк эзь мере. Озась удалонзо эземнентень. Моньгак арасель мелем, каня эсенек пурькатне-якстерькатне лият? Седе ён, седе мель витевель кадовомс теске. Арась, тень ловия мелень аваномакс. Секс апак капша, перькан ваннозь, увол-авол сыргинь Груня ды Наталья мельга.

Валтнэнь ёвтазь, Наталья саимизь – сонсь икелев, теке экскурсиянь паро ветиця, – кудонтъ тона ёнов, икелев, косокастовсть эмежензэ – эмежпирев. Састо, киртязь эскельксэ эскелясь пандятнень юткова, сонсь, кедьсэнзэ тей-товневтнезь, лодорсо, паро кайкссэ-мельсэ ёвтнесь пирень путовкстонзо.

Ёвтнесь, кодат парт тедеде ульнестъ чурьканзо, лепиякшнозь ёвтнесь ожолгадыця помидордонзо, пурькадонзо, таргазь модамардензэ. Лия ёвтнема ютавтсь куяртнэде.

Эмежтнеде «экскурсиясь» прыдовсь. Ветицязо саимизь «эрькензэ» ваномо. Те – кменьшка-кеветеешка метрань келесэ-кувалмосо, метрань сэрсьэ ведте пешксе чувовкс.

– Ведезэ, нетядо, чемень тюжа. Маштови ансяк валномс. Теяк паро. Ялатеке эйсэнзэ калтнэненъ эрямс маштови. Эрить. – Тень эйсэ ванноманок прыдовсь. – А ней, оят-ялгат, – ахолдась «эмежумань» прявтось кедьсэнзэ, – аядо варштадо эрямо пизэзэнек...

Якинъ аватненъ марто пандяюткотнева ды превстэнь эзь лисне мелесь: мекс минек эмежень, умарень кастоманъ профессиясь васенце таркасо ды весемеде вечкевикс? Ламотненъ-ламотненъ туртов модасо котьмамось – васень теv. Артист – превсэнтъ эмежть, инжеер – эмежть, седеень хирург – эмежть, тонаvтыця – эмежть... Мик балеринаяк – эмежть! Логиганъ коряс эряволь тенек копачамс планетантъ модармарьсэ, помидорсо, куярсо, чурькасо, капстасо... Тень таркас усктано сынст Египетстэ, Израильстэ, Мексикасто, Белорусиясто, Грециясто

Те кода истя? Месэ тувталось? Вейкенъсэ: вельть ламот – «агрономт». Кастыть эмежть сеть, кить «эмеж» валонть-как а содасызь. А содыть, кона ёндо модас озавтомс чурькантъ. Эрьвась эсензэ теvензэ кода эряви топавтозо! Балеринаськак... Фараонтнэнь пингстэ саезь ульнестъ сюронъ кастыцят, кевень таргицят, кевень лаксицят, кепсицят, путницят... Истя вана! Истя апак явно, зярдояк Эфиопсонъ пирамидась, Модамасторонъ дюниясь, путозь зярдояк аволь уле.

Теряй атя нучказы аштесь таркасонзо. Арсесь. Оймсесь. Учось самонок.

Кайсинек кузтемпентъ икелев карсеманок ды азоравантъ

мельга мельцек-мельцек сэдэвксенть ланга, колмо-ниле чалгавкстнэнь изнязь, кузинец-совинек кудыкелев.

– Вана тесэ, – чольдердсь, сизема эзь сода, Наталень вайгелезэ, ахолдась кедьсэнзэ керш ёнов, – кода поладкс кудонть – баня. А вана эрямо пизэнекак, – панжизе ожола-тюжа покш-сэрей кудокенкшенть.

Совинек кудос.

«Алкукскак «пизэ», – арсезевинь, зярдо эскельдинь лиятнень марто кенкшалксонтъ трокс «зепешка» нупальс. Кельгсть эйзэнзэ: керш ёно – диван ды мельганзо стуворнэ, вить ёно – голландка ды кезэренъ пингень апак лотксе урныця кельмонькай. – Велявтомс а косо. Кода эрить?» Икельце кудоськак теке – пештешка. «Кода эрить?» – эзь лисне превстэнь.

Икельце кудонъ каршо стенасонтъ Наталень раужо-ашо покш портретэнзэ. Вейке фотокувосонтъ сон балеринанъ оршамосо, теи балетэнь па. Фототнеде башка, мезть ансяк арасть понгавтнезь стенавантъ: театранъ ташто афишат, грамотат, газетасто керсевкст... Пианинантъ лангсо част, книгат, покш ваза, конёвонъ кувта, бальцянонь кечине, ашо илевстэ мазыйстэ кодазь кептерь...

– А ней, инжеть, – стувор экшс! – кармавтыця жой вайгельсэ мерсь Наталь, ансяк прядызе ёвтнеманзо кудочидензэ.

Ютынек удалце кудос. Мерсь озамс таркаваст аравтнезь эземнетнес. Калдор-калдор ойсинек.

Груня – стуворнэнтъ тона пес, келей вальмантъ икелев. Сонзэ каршо – мон. Теряй атя – монь ваксс. Наталь эзь оза. Сон азорава. Удалонзо плитантъ лангсто саизе рестаъь модамарь пачалгонть ды путызе стуворонть куншкас. Кельмонь-кайстэ таргась салатто пешксе вакан.

Те «вакандонть» кой-мезе лия ёвтама. Эйсэнзэ ве таркас керсезь кенерезь помидорт, куярт ды чурькат, аламнеде почодовить салсо, каяви майонез эли чиньжарамой. Парсте човоряmodo мейле ярсамось анок. Груня лездась керсемс кши, печтькетнень вачкинзе вакашкес, таркаваст путнинзе пенчтнень. Кодамо ава а муи эстензэ стуворэкшень тев? Салатось – монь вечкевикс ярсамопелем. Маряви, сондензэ тантей мезеяк арась. Порян... Теке теде содась Наталья!

– Эряволь куш пенчкень-пенчкень, – Теряй атя кепедизе прынзо стуворонть велькссэ лавсинень ёнов, тов, косо кирдевить зярыя сортонь чаракавтыця ведтне.

– Минь тонь марто, атя, коське кургот, Алёяк Груня марто, содан, истятнэде. Сестэ кинень нуртямс? Стуворонокак аволь неень шкань, пепсить-мепсить эйсэнзэ арасть. Весе эсенек. Экологически, кода ней кортыть, ванькст, – ливтнесь стуворонть велькска Наталень гайгиця вайгелезэ, «пенчкень-пенчкень» мелесь яволявтозель аэрявиксэкс ды шаштозель веёнов.

Истя тантейстэ, мик мазыйстэ, рестаъь модамарде, монень марявсь, зярдояк эзинь ярсне. Теке Груня истят зярдояк эзь рестне. Пачалгось, ванан, чамсь куроцто. Лисни, тусть аволь

ансяк монь мельс.

Ярсамонь кирдась прядовсь. Наталь урядынзе стувор
лангсто кедьгетнень ды ушодокшнось кофень кайсеме.
Ушодксонтъ колыя мон.

– Ужо, иля капша, – кепедия кедем ды кардыя сонзэ,
мезеньгак лиянь апак ёвта, меринь аламос учомс. Чатьмо-
незь стинь таркастон ды эрязкалезь лисинь ушов, ношкстынь
«Нивам» ёнов.

Курок велявтынъ. Эль-эль панжия кенкшентъ ды совинь
кудос. Мештезэнь лепштязь, кавто кедьсэ кирдинь покш ар-
буз. Путья, сеedyстэ лексезь, стака канстом вальманть кар-
шо келей эзементень. Тестэ сеске путыксэлия стувор лангс.
Эзь лисе. Савсь путомс мекев ды озамс тарказон.

– Ужо, ужо... – кардымим азоравась. Сонсь куроксто со-
вавтсь кудыкельде покш вакан ды путызе стувор лангс, тар-
гась покш пеель. – Ней тев тонеть, Алё!

«Ну и штере, – арсезевинь Натальде, – эрва ков кенери!
Палозь палыть тевтне кедьсэнзэ».

Стинь таркастон, путья пиже покш оскам совавтозь вака-
нонтень, прок пизэс, саия анокстазь пеелентъ ды керсия лам-
бамо потьмеж умарентъ палонь-пал. Ярсынек ды апак эряз-
кале кортнинек эсенек юткова теде-тонадо. Шкань-шкань та-
кода салава кепсия вановтом мельганок яксиця Наталь лангс.
Лангсонзоль, мезесь вельмевтсь мештесэнь кецневтиця ёж-
от, се сэняжа нулька ожа, ансяк лавтовонь копачиця, ковтась.

Апак учо сыргозсь потсон стихень ловномань толгам. Ви-

темтия рунгом, кепедия вить кедем мештем икелев ды тал-
нозь, каршон вальманть лангс ванозь, пшкадинь Есенинэнь
валсо:

А янксян, а тердян, а авардян,
Пингем тусь, прок валскень стямсто сув.
Сёксень поекс пизем ало тардян —
Мештесэм ней аволь тундонь увт.

Тон ней састо веренть сангам пансят
Кельмсэ чавозь, пужозь седеем.
Ды а тердить эйсэм лаймот-паксят
Кепе чийнемс ней арась мелем... —

прядынь меельце валтнэнь ды мария, кодамо стака канст
талномадонть каинь лавтовон лангсто. Чамам палсь. Кедем
эль неямга сорность. Теке марто, совасть эйзэнь вечкевикс
ёжот. Прядовсь ловномам талаень каштсо ды сеске цяпамо-
со. Теряй атя эсь мелензэ нурькинесть эвтнизэ Есениндэ,
сонзэ шкинеадонзо.

Эзень арсе, превскак эзь совсе, эзимем содавтнея мелесь:
Наталь апак учо, вана ней, кази тень истямо седейс педтця,
астувтовиця казне.

– Мельвановикс инжеть, Алё ды Груня, ледстнемакс те-
чинь чиденть мелем поладомс Есенинэнь. Алё ёвтнесь по-
эттэнтъ стихсэ, Теряй лелям пачтясь тенек шкинемадонзо,

мон, прынь мельс, поладомс моросо

Вальмам вельссэ ковось. Вальмам ало варма.
Сиянь тюс тополесь штапьскадомо кармась.

Гармониясь ризнэзь васоло аварди,
Нусманя вайгелесь веленть песэ тарди...

Кунсолынь, мерян видьстэ, апак згиля, кургонь автезь. Истямо ванькс, сэрей, истямо чольдеркай вайгель марсемс тень эзь савкшно, прянь апак шна, радиостояк. Прядызе Наталь морамонзо, озась, талномадонть, марявсь, кундатось келезэ, зярс-бути чатьмонезевсь. Нусманя моронть лувозо, менельга ливтница вайгелесь яла гайгсь пряудемсэнь.

Кода сеедьстэ эрси, аватнень кортамонь темаст аволь чуросто эрси вейке: эмежть, умарть, пиреть, оршамот, ярсамопельть, питнеть..., цёратнень – лия.

Лисинек Теряй лелянь марто кузтемпес. Озынек тесэ свал кирдевица эзементень. Чись эскелясь прядовома ёнов. Перьканок васолга-кува чатьмонезь чарасть сундерькст. Опаня. Каршонок маралякс аштиця пичетне аштить, сорк а теить, теке учить мезе-бути покш, мелень топавтыця. Кортамонок мольсь васняк масторонок, покш масторонок каладомоадо, СССР-нь ёмамоадо. Покш мель явинек, мекс чикор-лакормолить ве кудосо, ве семиясо эрямонь тевтне, мекс явицятнеде полициятнень коряс седе ламо, мекс ламо урозэйкакшт...

Талновтсь Теряй лелянь, кода моньгак, эрзянь келенть рез-эма ормазо. «Кие чумось? Мезе теемс?» – кевкстематне сизеть каршо валонь учомадонть.

Тедетонадо кортамонок мольсь, зярс чипаесь эзь кекше чополгадыця виренть тона ёнов ды эзь эскельдя седе малав сэтьме чокшнесь.

Уле ушодкс ды уле-уле пе

Кизэнь се маней лембе чокшнесь умок теевсь астувтовиця ледстекмакс се вастовомадонть. Ютасть кеменьшка, паряк, седеяк ламо иеть. Ламо ведь чудсь лейтнева. Ламо эрва ко-дамо тусонь ды парцунонь пельть сиземань апак сода уйсть Пичеле велькса. Ансяк сынсь содасть, мезде арсесть ды ко-дамо тевень тееме капшасть.

«Мезе полавтовсь эрямосонок Черькайтнень кедьсэ уле-мадонок, се опаня чокшненть ютазь?» – шкань-шкань совси прызон кевкстемась, совси монь апак кевкстне. Мезть кевкст-немс? Мезе ульнесь – ульнесь. А ёртсак.

Полавтовсь ламо мезе. Васняк, содави, кемень-кеветее иес сырединек. Тедетонадо а кекшат. Эрямонок Груня марто кода ульнесь, истя кадовсь. Кудонь-кардазонь ды пирень тевтне мольсть эсест киява, седе ламо, сеedyстэ – каштмолезь. Тее-зель, мерян апак покшкавтне, ютазь шканть перть аволь ала-мо.

Ветявтынек газ. Калавтнинек каштомонок. Сонзэ таркас

теинь лия нупальне – пидема-панема, ярсамо ужине. Копачинек ташто, сыредеяк сыре кудочапонть пластикень валдо лазсо, сайдинг мерить тензэ. Вельтинек кудолатонк сэнъ жесьтсэ... Саты, маряви. Каня зняро иень перть «изнявксонк» педе-пес ледствявить? Теяк, кинень сынъ, неть «сявордозь» тевтне, эрявить, лиянень, кинень?

Ней икельганок поркснезь асфальтонь кияванть эрва эскелицясь киртясынзе эскельксэнзэ, полгарьгавтсынзе сельмензэ сэнъ-валдо, сэнъ-пиже кельсэ кортыця «дворецэнек» лангс. Те вечкеви, рашты потсон валдо, кенярксонь мельтьарсемат. Эно кода эрямс, шешкемс мода кеняркстому? Мезень кис сакшномс эрямонь паксянтень? Удомо ды пекень пештеме?

Кемень-кеветее иень телетне-кизэтне челькевтеме эзь юта эсенек ютксоаяк. Мон ды Паксютонь Груня теевинек вейкенек-вейкенек туртов седеяк лездыця, седеяк чарькодиця ялгакс. Бажинек стака шкатнестэ аравтомс вейкесь омбоцентень лавтов. Истя, тевсэ-мелявкссо, кеняркссо-ризкссэ, кивчк ютасть, теевсть ледстнемакс аволь аламо иетне.

Черькайтнень арась урныгаест. Арасель сеть иетнестэяк. Сонтемензэ, содавикс тевесь, – стака. Те кода умонь шкатнестэ кадовомс лишмевтеме. Истятнэнь ломанькс эзь лово велесэнтъ. Секс Черькайтненень, васняк Натальнень, аволь чуросто эрявкшнынь: тень ускомс, тонань...

Саемс тунда ошсто велев самонть. Ярсамопельть ускома, эрва кодат курмот-кармот, сынъгак эрявить... Таштавить

аволь аламо. Ардт, ускомат... А редясак, прядови якстере кизэсь, мельганзо, ванат, бизмолды, тарка вешни, сёксесь. Аламонь-аламонь анокстама ошов, телень кудов. Мелявкст-нэде прявелькскса! Пурнамат, ильтямат: чурькат, модамарть, помидорт, умарть, торлат, эрва мезе марто эрва кодат банкат... Ведыгемень вайгельпетнень истямо канст марто а эскелясыть. Лишмесэяк, кода икеле, а усксыть. Ёмасть сетнеяк. Эряви мезеяк сынст полавтыця. Монь – «Нива». Мезе седе вадря? Аволь урныгай – пача, эрва кува юты, ускияк... Аволь весть, аволь кавкстькак эмежень-умарень кансттнэнь, тундонсетнеде башка, «кандтнесь» лишмень вийсэнзэ «телень кудов» самай те урныгаесь.

Седе сеедьстэ Наталь марто – эряволь меремс Наталь патяй, сон кеменьшка иеде, тагояк ледстяса, мондень покш – ардтнинек кизэнь куншка, кстыень кенерема шкасто, Валдайвелев, буйкуншкань найманов.

А содан мекс, «патяй» валось удемезэнь совамо эзь капша. Мекс – а содан... Мекевлангт, сон айгсь, васолгавтсь эйстэнь аванть. «Кодамояк а патяй!» – сеересь мештесэнь кодамо-бути кольнякай вайгель. Тевесь, бешом, аволь свал ансяк иетнесэ. Улить ёнкст, ёжот, онкст, конатне сынст лангс а ваныть.

Талай эзь чулгово тень, мекс те лемесь монь иетнень а кунсолы, сеедьстэ совси прядудемезэнь, мукшны эстензэ лембе таркине ды бизны эйсэнзэ, теке чаво кедьгес понгозь промо. Шкань ютазь панжия тувталонть...

Кувать кандтнинь, усксинь, лездынь мейсэ маштынь «Нивасо» вакссон ардтницянтень, те, монень марявсь, моданть-масторонть лангсо весемеде мазый-гайгиця лементень, чаманть, рунгонть вейкенъ кис – сон эрясь седейсэнь эсензэ сэтьме эрямосо.

Ламоксть ардтнинец мартонзо ошов, седеяк ламоксть – найманов ды лияв-ков. Зяроксть? Каня ловови! Ды, мерема, тевесь тень эйсэ? Мельсэньгак арасель – ловомс. Усксинек мезе эряви ошов, мезе эряви, сеедьстэ кой-кодат ярасмопельть, – ошсто велев. Вечкевсь мартонзо ардтнемс, мельвитсь, мезеяк а мерян.

Велеванть, эзь саво учомс, ёвтасть тень, срадсть-якасть лисьмалангонь келят-мелят. Истя-истя, келя, Паксютонь Алё-Алексей, мазый кудонь теицясь, Черькай Наталь марто тапсеви. Мезть ансяк эзь мендеря! Келесь, кода кортыть, ловажавтомо – сизема тунь а соды, мезе мелезэ, сень банговты. Ули текенень валмеревксккак: эрванть кургонзо а потомдасак.

Те – келят.

Ёвтнемс, кода ульнесь, тунь апак сёпо?

Ёвтнеса.

Васняк кодаткак «тапавкст» ютксонок – видьстэ мерезь, вейсэ, ве таркасо удсемат-кеверькшнемат – арасельть. Сёпомадо, эсь прянь идемадо мельгак превзэнь эзь сакшно. Паряк, видькстан, зяро иень перть тень эйсккак пачкодевлинек... А содан... Мезть а эрсить эрямосонть... Мон виз-

динь теемс эскелькс малавгадомантень, пелинь. Кирдинь неть мельтнень потсон. Кекшезь кирдинь. Ёждон Натальнень вестькак эзинь ледстне, «вечктян» валось кургстон эзь лисне. Вестькак эзия пала, эзия кутморда.

Аволь весть стардокшныя Наталень кудосо эли кузтемпе-сэ-пиресэ ськамонзо, Теряй лелявтомо. Аволь чуросто пси читнестэ пельсштапо. Ды мезе? Вадря, улиндеряй мелем, пугы чай, кофе, аламошка калякатано теде-тонадо ды – вастомазонк! Вана кода ульнесь алкукс.

Истя кемень иеде ламо вечкинь салава, эсь пачкан, кекшнинь вечкемам вечкевиксэнъ эйстэ, Натальде.

Лездынъ урныгайсэнь. Лиясо-мейсэ. Чинь-колмонь ютазь совсинь варштамо, кортнеме Теряй лелянь марто. Кой-зярдо кулялопань, телевидениянь материалтнэнь, масторсонок молица тевтнень кувалма пачколинек мартонзо пси пелькстамос. Мерема, Теряй лелям маштсь марязентень, ловнозентень эли неезентень виде питнень путомо, «сэвтнеме», явномо-путнеме. Маштсь диалогонь ветямо. Превей атысь, мезть кортамс. Лия марто Пичелесэ а кинь марто ды а мезде кортамс, а кинень пшкадемс. Сон – ськамонзо. Кулозь веле. Кая алкукс велетне весе истят? Мекс истямос пачкодсть? Кие чумось? Кияк арась? Эли аламось-аламось чумотано весе? Улиндеряй весе – те, лисни... кияк. Эрси-арась истя?

Веле, веле...

Сёвонь Микольмезень алкине, олгсо вельтязь кудынесть икеле пандочамине. Телень гайги чи. Салазкесэ ды эйгажа-

со киракстница эйкакштне, кода коткудавт пизэсэст: кузить, ардыть, чийнить, пижнить... Якшамось а маряви. Чамаст эв-темадонть якстереть, палозь палыть. Зняро, кодамо вий ды кемема икеле чинтень неть а аштиця рунгинетнесэ! Умок те ульнесь. Пек умок. Стувтомс вана эзь стувтово.

Ней Сёвонень юртсо пря невтни, каштансто ваны лиятень лангс покш, кавто сэрксэнть якстере кирьпечень кудо. Сонзэ прок кияк мунизэ-колдовизэ:

Ламо-ламо иеть икелензэ пандочаминесь эзь маря, ды уш зярдоак а мари, а цёрынень, а тейернень вейкеяк вайгель, ве телеяк эзь пурнавкшно киракстнеме эйкакшонь пизэ.

Велень тевтнеде арсезь, совсить удемезэнь ютазь пингень колоньгемень иетнестэ якстерестэ чудиця лейтнеде сёрма-довкстнэ. Мезекс, мезень кис, кинень эрявсь ильтямс тона-чив Теряй лелянь кондятнэнь? Мезе те макссь? Секень вант, теде ламонь кувалма эрва мейсэ сюпав масторсо эрятано кажосо.

Бути, мельсэнть, колмо-ниле чить кодаяк а пачкодилинь Натальмезнень – кудонь тевть, кодаткак лия тувталт, – эрва юткошкасто валгиль седейзэнь тошначи, теке ёмавтылинь мезеяк пек эрявикс, педсесь эйзэнь ёжо, теке мезе-бути тень а саты, китны мезень-бути кувалма мештесэнь верень пан-сицясь...

Вастован те аволь сэрей-келей аванть марто, ды эрямонть каргоцьчизэ поты, валдоми, пештяви безарьксэнтъ таркас ке-няркссо.

Зяроксть эзинек вастневе Теряй лелянь марто, кулеля-монь, Натальнень акемемань валт, видьстэ эли чирьстэ ёвтазь, пельдензэ эзинь марсе. Кемсь, кемсь, монень маряви, нинстэнь педес-пес. Кода илязо аште, ульнинек мартонзо ламонь кувалма паро ялгакс. Зярдояк лангозон эзь пеняця, пенень пачк эзь корта. Чевте вайгелезэ кадовсь тень паро ледстнемакс.

Таго Натальде.

Свал кирдинь мель содамс сондензэ седе ламо ды эрва ёндо. Кие сон, кодат бажамонзо, кодамо вечкевикс, оймень туртов тевезэ – хоббизэ, улить-арасть эрямонь тештензэ, ков сынь тердить? Кодат ютазь кинзэ-янонзо, ков ветить, кодат лия ёнкст корсонзо... Мель явинь, содави, – теевемс седе малавиксэкс.

Карминь содамо: кемгавтово иеть эрясь мирде марто, ульнесь урвакс. Явсь. Мекс? Эзинь кевкстне. Авадря. А кевкстнить. Сонсь валгак эзь ёвта. Чачтась-кастсь тейтерь.

Пинге важдось филармониясо морыцякс, ансамбля марто ардтнизэ масторонть трокс-кувалт ды трокс-ушкс. Пачколесь томбалевгак. Пенсияс лисезь, кундась кудонь-кардазонь тевс. Путсь эсензэ велес кудыне ды тундонь лембе читнестэ саезь сёксес эри тесэ, чачома масторсо, ютавты чинзэ пирень ды кудуютконь певтеме мелявкстнэсэ. Тевень ды кудуютконь ваньксчинь вечкиця – тень мон редия сеске. Валонь кирдий. Вановтом вакска эзь ютакшно теяк: эйсэнзэ кирдеви микшнемань-рамсемань, ярмаконь ванстомань-таштамонь ёжо.

Нурькинесть: берянь, эйтэнзэ шаштовтыця, явиця, ко-
даткак авитевиця безарькс ёнкст эзинь тешкста.

Теньгак а кекшсак, тедеяк мерема: вечкиця седеесь, те уш
эседень, – сокор, ламо мезе а неи, ламо мезень а редясы,
юты вакска. Мон истятнэстэ...

А сонсь Наталь?

Кода вансь монь ёндо эрва мелензэ топавтоманть лангс,
кодат ёжот ченгсть-палсть потсонзо? Эли кодаткак ара-
сельть? Каня эзь чарькоде, мезень кувалма, мекс, теке уре,
топавтынь эрва, лиясто стяконь, кольнема ёнов молиця
энялдоманзо?

Арсян, чарькодсь, ансяк тевтне-усксематне сайнесть
верькс. Лездынь аволь ансяк урныгайсэнь! Васолдо неявиця
ожо тюс сайдингсэ вельтязь кудонь чапось, вакссонзо латалк-
сось, пирекенкшкетне, пирявкстнэ – сынь «сювордазь» монь
кедьсэ. Соват баняс – мазычиденть аймельгадат! Аволь баня
– таташке. Тень теия, чарькодеви, ярмакто. Теия мелень пу-
тозь. Теяк, важодевельгак сиведезь ломань, саевель кавксть,
паряк, колмоксть седе ламо. Кода илязо уле, чипайкс вандол-
дыця те кудынесь кадовсь весемеде астувтовикс ледстнемакс
Наталь марто ояксчиденек, сеть, ней уш умонь, иетнеде.

Мезде илязо тошка седеесь, бажинь топавтомс энялдо-
манзо, лездынь. Кирьвалесть-эзть вечкемань икстерькат На-
талень мештесэ? Кодат ёжот яксесть эйсэнзэ? А содан. Истят
коргамот ютксонок арасельть. Палсь седельмась, велявтсь
куловкс... Мезе ульнесь – ульнесь.

«Коське», ламо иень романом прыдовсь апак учо.

Весть Наталь тердимим Валдайвелень найманов. Эрявсь, улема. Мезеньгак рамамо, паряк, миеме. Бути эряви ды бути шкат ули, мекс ломанентень вадря а теемс? Сынек шкастонзо. Чипаесь эзь кенерекшне кирвазтеме каштомонзо. Пси эзь маряво. Тень лангс апак вано, ломантне кашкасть, теке коткудавт, вешнесть кинень мезе эряви ды седе уцяз. Эрьва ёндо пирязь келей-кувака таркась увнось вайгельтнеде, урныгайтнень урномадост, тандавтниця вешксемадост.

Аравтыя урныгаем совамо тарканть малас, панжия удалце кенкшенть ды одс озынь тарказон ветямкаенть экшс. Наталь саизе кавто ёндо ды кандызе васня лапужа, аволь домка ящикенть, кандынзе вейсэнть кувака стувор пес, мельганзо – омбоценть. Эйстэст эрязкалезь таргсинзе кстыйде пешксе литрань покшолмасо пластикень ведрынетнень. Аравтнинзе седе мазыйстэ ды неявиксстэ. Стясь стуворонть экшс ды ушодсь, тей-тов ваннозь, рамицянь учомо. Прясонзо кувака нерь ашо кепкине, лангсонзо ламо зепе-зепине марто ашназа тюс панар. Кирьгазонзо понгавтозь кескавне – те сонзэ «кас-сазо».

Урныгаем пания лия таркас, аламнеде веёнов. Пельспанжадо кенкшканть шкань-шкань варштнян микшницянтъ ёнов – «чиить-арась» тевензэ? Меремс, ламо рамицянзо, а мерят. Ялатеке аламонь-аламонь, ванан, кирдевицят, кевкстницят-ванныцят икелензэ пурнавкшныть. Седе ламо, кода эрьва косо, эрьва кода кизэкс оршнезь аваломанть. Наталь

тевень содазь, ливчянасто кайсесь кстыйтнень ведрынетне-
стэ рамсицятненень полиэтиленэнь кескавнес, ловсь, сай-
несь ярмакт. Ве таркасо, лисни, тевезэ эзь нерьге.

Шкась мольсь.

Ванан, Наталень каршо стясь бурина, палманень сэрсьэ
аволь од-сыре цёраломань. Раужо сакалонзо нурькине-
стэ наразь. Тусто-раужо, теке кренчень сёлмот, черензэ
нолдазь лавтовонзо ланга. Марявсь тень, чикуншкань эри-
цятнень эйстэ. Чамакиськезэ тюзала, сельмензэ-сельмечирь-
кензэ раужот, судозо будолма марто. «Тостонь, тостонь,
неяви...» – прынь мельс.

Кемевсь тень, те рамицясь колмошка ведрынеть «амоль-
ди» апак кавтолдо. Тень таркас – кувака, монень эзь
маряво мезде, налкставиця, сельместэ сельмес ванозь
кортамо. Кортасть, кортасть, цёрась апак учо юрк ютась
стуворонть пева Наталь ёнов, стясь ваксозонзо ды
вить кедензэ, теке мезе-як араськак, теке ваксонзо
низэ, каизе Наталень лавтовонзо лангс, норовиксэль
паламонзо. Наталь, цельнезь-пейдезь, керш кедьсэнзэ
виень путозь тостядизе сакалов альгачонть. Вырк
потась визькстэменть эйстэ. Стувтызе, мереват,
микш-немань тевензэяк.

Те идем сценась сыргавтынзе тортан. Кирвазинь
пряк-касто пильгесурс. Неезесь тень ульнесь гай маней
чистэ пурьгинень зэртекс. Кода кирдевсь пряк – чи-
емс кутморицятнес ды кирьгадо чочамс, кадык мон-
день сэрей, чикуншка ёнксонь раужо черень кан-
дтницянтъ, – превс а саеви. Паряк,

лияккак теемаль: нолдамаль моторонть ды ношкстамаль ку-
дов. Истяк эзинь тее. Кадовинь.

Найманось прядовсь. Носкозь-чатьмонезь, Наталь пур-
нынзе микшнемань кедьёнксонзо вейс ды кандынзе «Ни-
ванть» ваксс. Сонсь панжизе удалце кенкшенть, путынзе ур-
ныгаенть потс чаво ведрынетнеде-мезде пешксе ящиктнень.

Мон чувтомозь, «кельтеме» аштинь озадо ветямкаенть
экшсэ, ванынь икелень вальмаванть, неемс мезеяк эзинь нее.
Лездамодо эзинь арсеяк. Вал эзинь правто. Аноколинь сезе-
вемс апародонтъ. Сорнынъ. Эзь кирдеве, потсон гувнось аке-
мемань, кулелямонь тол.

Кальцьк, мария, мерсь кенкшкесь. Озась Наталь. Виень
путозь пекстызе мельганзо кенкшкенть. Нолдыя, мотордо-
зевсь моторось, ды састыне сыржавтыя урныгаенть икелев,
Пичелев келей кинть ёнов.

– Тон, ванан, анокат мадемс, – эзинь кирдеве, лиссь кург-
стом, – эрвань алов. Ёвтынъ валтнэнь вайгелень апак кепе-
де, явнозь-явнозь. Сезия пилес эциця ды кутькиця чатьмо-
неманть ансяк кенеринек лисеме Валдайвелестэ.

– Нейке лоткавтык! Нейке! – соракадсь, кедьсэнзэ, теке
карводо, ахолязь, пиже-ожо вайгельсэ серьгедсь кабинасонть
вакссон аштицясь. – Лоткавтык, нейке лоткавтык, лисян!

Мон чатьмонинь. Ёвтазь валдон шожда тень эзь кар-
ма. Эзизь оймавто верем пижнематнеяк. Сынст кунсоломо
«лишмем» эзь арсеяк. Кургонь пекстазь пачкодинек Пиче-
лес, пачтия Наталень кшнинь пирекенкшест икелев. Лоткав-

тыя «Нивам», панжия удалце кенкшенть, капшазь таргсинь
ящикензэ-мезензэ, пекстыя кенкшенть, озынь ды велявтынь
ажиян кудов. А монь, а Наталень кургсто эзь пра валгак.

Мезе сестэ, кизэнь се маней валскестэнтъ, лисекшнесь
наймансо микшнемстэ, чумоль-аволь Наталь, кадовсь асода-
мокс, ваясь шкань чопода потмакстомо отьмас. Паряк, а истя
теекшнинь? Кода, алкукскак, а покордавомс тензэ валтнэде,
конатнень ёвтакшнынь сестэ ды конат эзть стувтово течис?
А кода сестэ улемаль эстенъ?

Истя прядовсть ламо иень перть вастневеманок, оякчисэ
ды аволь кеняркстомо эрямонок. Кадовсть эйстэст, кадовсть
видькстамовтомо вечкемадон валдо, ёжонь витиця ледстне-
мат. Паряк, те ульнесь ванькс-маней, прок од шкань, вечке-
ма? Монь ды ...сонзэ? Эли те ульнесь седейшкавань ояксчи?
Содык варчик...

Чуман? Кевкстнян ней эсь прям цянавокс ливтница иет-
нень ютазь. Кочксян прясон кеняркссо эрязь иетнень ды янк-
сян, мекс истя шождасто, мик псистэ, кемзисемге иесэ цёры-
некс нолдакшнынь кулелямонь ёжон... Мекс сестэ эзть кир-
девкшне ведьмень?.. Эряволь тень седе превейкс улемс...
Эряволь, эряволь... Удалце превсэ минь вейкень пес превей-
тяно.

Те ней, ламо иень ютазь, васолдо, ён, паро кортамс, превть
максомс, астака улемс откерекс. Сестэ... Ломанень оймесь,
яла кортыть, – чопода. Сонзэ панжомга, седе домкасто со-
дамга, вейсэ эрязь, ютама ламо келей-кувака кить, конатне

ламонь таркава почодозь поркснезь суликасо.

Омбоце ава марто эрян. Курок топодить кемзисемге иеть, кода Груня марто вейсэ нергтяна. Ды мезе? Грунянь корозо таркань-таркань каднови чопода векс. Истямокс уш, мерама, сась Ломанесь Мода планетанть лангс.

Абунгалемс а мезть: Модамасторось, Менельёнкстнэ ды весемесь, мезестэ сынь аштить, эрить-кирдевить авейкетькс-чинь коенть лувсо. Эрьвась – сонсь. Модась, Ковось, пи-земень байгинесь, молекулась, атомось... Лия истямо, сон-зэ кондямо, – вешнек эрямопинге – а муют. Видестэ вейке ине поэтэсь мерсь: эрьва калмонь марнэнтъ ало калмазь Чипелькс.(косо-бути те мелесь ёвтазь, икеле)

Черькаень Наталь кадовсь паро, чинек-венек тевсэ лаки-ця ломанекс, ялгакс. Кодамо сон обуцянь, коронь коряс, пот-моёндю, кемень иень перть эзь панжово. Тень туртов эрявсь югамс кувака, чувнозь-лазнозь, таркань-таркань поркснезь суликасо почодозь ки. Ды аволь вейке-омбоце вайгельпе. Эрявсь эрямс вейсэ, ве кудосо. Ды аволь ие-омбоце. Неия, наймансо тонол раужо пря цёранть марто эльнемадонзо башка, ансяк паро ёндо.

Кевень седей

Кода тетъ пшкалить?

Кизэнь маней аволь пси чи. Аловелесэ ютавтовсь эрзянь кезэрень Озномань покш кой-кирда. Сакшность эйзэнзэ эрва ёндо ламодояк ламо ломанть, морыцянь курот, киштсть-морасть аволь ансяк тестэнь, лия ёнкстнестэ сыцяткак. Ульнесть зярыя омбомасторстояк. Истят Эрзянь Инешкипазонть Озномат-покшчить ютавтневить вельть чуросто.

Прок кодаткак раужо, тандавтниця пельтькак зярыя пингеть а кирдевить эрзятнень велькссэ. Моротне-киштематне, налксематне, эрвела ёжотне жойнесть-шалность чадыведекс келей луганть келес. Певтеме мизолкст, пеедькшнемат, кенярксто цитниця сельмть...

«Мекс ломантне куш аламнеде васов а ваньцят, сокоронь кондят? Мекс неить ансяк сень, мезесь судост ало? Мекс марить ансяк сень, мезе мерить верде? Мекс эрить ансяк те-чинь чисэ?» – чарасть-велясть ды эзть паневе, прок кирма-лавт педясть, Ёгань Тимань Теряень превсэ арсематне, зярс эскелясь тарканть, косо учось бусост.

Покш чинть прядовомга цёрась сыргась кудов. Пазикесь, конас кузсь-совась, – пешксе. Ютась удалов. Муевсь, теке сонзэ учось, чаво таркине. Варштась тей-тов, озась. Эйстэнзэ

вить ёно аштесь, вал эзь правто, келей чама, валдо черь-чама цёра, керш ёно – ава. Сэрьс, озадояк чарькодевсь, Теряйде аволь сэрей. Нурькалгавтозь тусто черензэ судрязь човоньс, сюлмазь парсеень лентынесэ. Тей-тов юхайть пулынекс. Теряй эськанзо тешкстызе: «Аволь цивтор журналтнестэ, яла теке ваксканзо лангозонзо сельмень апак кая а ютат...».

Зярс-бути ардсть чатьмонежь. Кунсолость икеле таркат-несэ озадо аштиця аватнень лужаня кувака морост ды седямонь таркас моторонть урноманзо. «Теяк, – сась мельс Теряй, – мезть, мезде кармат кортамо асодавикс марто? Келентькак онкстызь кирдемс кавто часонь перть, кудов пачкодемазонок, а ён». Илязо каназкадо...

Васенцекс кшувавтызе лепштиця каштмолеманть, эскельдась троксканзо, макссь вайгель, Ёгань цёраст – Теряй.

– Кодамо, тонь койсэ, морокуро морась весемеде парсте? – велявтызе шержей кавшаня черь прынзо аванть ёнов ды салонсонть морыця вайгельтнень пачк серьгедезь серьгедсь чатьмониця, икелев ваныця шабранстэнь; керш лавто-возо тень пингстэ, маризе, токавсь аванть вить лавтовс.

– Кодамояк, – ёртозь ёртынзе валтнэнь, велявтызе прынзо, варштась кевкстниця цёранть сельмс асодавикс авась ды апак кавтолдо, мештензэ икеле кедьсэнзэ ахолязь, ёвтызе эсь мелензэ. Кортамсто човине турванзо ютксо кувтолк-кувтолк кивчкаесть вейкеть ашо, теке артозь, пеензэ.

«Вый, кодамо мазый! Косто Инешкипазось кандызе тей истямонть? Сэнь сельмть, аволь кувака, эль редявикс будол-

минев судо, пеень ванстыця турват... Истямо чуросто-чуросто понгони сельметь икелев...» – токавсь, сась мельс цёрась.

– Те кода истя? Истя, мон меревлинь, а эрси, – берянесь вадрявтомо а эряви. Те – пингеде-пингень кой. Сон кинень-гак а полавтови. Кияк ды морась ветень питне, – вить кедь-сэнзэ Теряй юхадсь икельганзо сравтневикс коштканть, пси-стэ варштась сельмезэнзэ, эзь пра вемельс сеедьстэ корты-цянтъ марто. Гайгиця вайгельсэнзэ марявсь кеме кор, нар-девчи.

– Истя вана, моравиця морось ютавтовозо седеень пачк, тосто лисезэ, сестэ сон чачи морокс, сестэ карми гайгеме ды ёвтнеме кодамояк ёжодо. Истяко... – авась пря эзь максо, мелензэ верьга вайгельть ёвтамсто сеедьстэ ахолясь кедьсэн-зэ, мерт, потевтеме (теньгак редизе Теряй) мештензэ икеле, неявсь: обуцязо – тол.

– Паряк, истяк. Мон неть тевтнеде васолан, маряви, ви-деть валот, – сэтьме вайгельсэ, апак тално ёвтызе тень лангс вановтонзо Теряй; аламнеде суюконязь аштезь, видимтизе рунгонзо, варштась превень максыцянтъ лангс, козкстась ды поладызе: – Кортнетяно, а кинень кода мерить – кашт. Мон – Теряй, Ёгань Теряй.

– Вельть уш леметь кодамо-бути чуросто вастневиця. Те-ряй... Васенцеде марян. Косто истямонтъ муик? – кевкст-ницясь, прысонзо тей-тов чиремтнезь, эсь лемензэ ёвтамонь таркас кармась педькшнезь кевкстнеме-исковамо валонтъ юрдонзо. Кедензэ лангсек-лангсек путозь кирдсь элесэнзэ.

– Мекс ачарькодевикс? Эрзянь тюштянь пингень лем. Паряк, «терявтомс» валстонть. Монь койсэ, сядоксть мазый эрва кодат Альбертнэде, – кармась ловомо керш кедень сурсо Теряй, – Эдуардтнэде, Христофортнэде, Евлампийтнэде ды лиятнэде. Эзить марсе советтнэнь шкатнестэ пек содавикс «народной» академиктенть Мальцев Терентийде? Арась? Содавиксэль ломанесь, пек содавиксэль... А кода тонеть пшкалить? Ёвтасак-арась?

– Мон – Черькаень Наташа, седе ламот – васняк, велесэ – мерить тень Наталь. Морыцянь. Важдолян тескень филармониясо, – икелев, ветицянтъ ёнов ванозь, гайги вайгельсэ ёвтызе аволь ансяк лемензэ, важдодема тарканзояк.

Авась чатьмонезевсь, лепштинзе турванзо, теке учось, ме-зе вадря-паро мари шабранзо пельде. Седе ёнсто путызе ку-мажанзо лангс раужо цивтёркай юдминензэ. Вить кедьсэн-зэ витизе ашо, пизёлонь якстере цюцькасо «пупсезь» панаронть сивензэ, нолдызе керш кедензэ ды путызе юдминентъ лангс. Вить кедьсэнзэ кирдсь, илязо томбаво-эшкее, ике-лензэ кшнинь недьсэнтъ.

– Тетят эли ават казизе тетъ те мазый, зэмень кирдий ле-ментъ? Эрзянь кельс ютавтови – «парочи», марситель?– пе-едькшнезь, паро ёжосо шнызе Наталень лемензэ Теряй, саи-зе вить кедензэ икелензэ озамкаень кундамонть ды нол-дызе, кода Наталь, элезэнзэ, велявтызе прянзо аванть ёнов ды яволявтсь тензэ: – мон тетъ карман мереме Натуш, эр-зякс, кода пшкалестъ покштянь покштянок. Каршо молеме

а кармат?

– Арась, – мельспародонтъ цивторк мерсть пеензэ, пейде-
зевсь авась, – гайги? Алкукс мазыйстэ? Зярдояк эзинь арсе.
Тетям мерекшнесь аванень путомс те лементъ войнав туем-
стэнзэ, авам – каршоль. Сон путыксэль Маруся. Изнясь те-
тям. Превеель... – Апак учо нусманя сувось нардызе чама-
стонзо эрвела ёжонь тешкскентъ.

– Тетят... кирдевсь мельсэть? – нурькине чатьмонемадо
мейле варштасть салавине, кевкстизе Теряй прынзо нолдазь
аштиця Натушонь. Косто-бути васолдо апак учо сась тензэ
мель ёвтамс аванень мезеяк вечкевикс, чевте, лембине, се-
дейс педиця.

– Арась. Ковонь ютазь чачомадон мейле – авам тень зяры-
яксть ёвтнize – сонзэ саизь немецтнень каршо «за Родину,
за Сталина» тюреме. Мекев уш эзь велявто. Касынь тетявто-
мо. Секскак превзэнь мезеяк, кодамояк ледстнема эзь кадо-
во, – прядынзе валонзо цёранть килангонь ялгазо ды, сель-
мень апак кончтне зярс-бути буссонть икеле озадозетнень
лангс ванозь, стакасто лектясь.

Нетъ валтнэнь марязь, ледсть Теряень мельс ледстнемат-
не эсь тетянзо марто явовомань чокшнесь. Ледсь мелезэн-
зэ мизолксозо, вайгелезэ, якшамо кудованть, мекев-васов
яказь, мелявкссто пешксе сельмензэ. Тердекшнизь Сура чи-
рестэ, косо чувовсь-путовсь немецтнень каршо туремань бу-
есь. Удось, а валскестэнтъ саизь тов, косто уш эзь веляв-
то. Ульнестъ ацамковонь пейсэст чикордыця якшамот. Кода

эзть вrado, менсть сеть якшамотнеде ды вачо иетнеде, превс а саеви Теряйнень течис.

– Тон авать – съкамот? Вейкине эйкакшат? – кивчк кепедевсть сельмечирькензэ, кевкстизе Теряй, мекс-бути стакасто лекстясь ды чиремтизе прянзо керш ёнов, седе парсте марявост Наталень валонзо.

– Тон мезть... Каня а содат, аванок шкасто вейке эйкакшто кортамот, мертть, эзть марсеве. Те ней... Мон колмо лелядо мейле нилецян. Чачинь кемнилее иень ютазь веженсь лелянь чачомадо мейле. Истя уш лиссь авань... Кемнилее иеть касынь вейкешкакс. Кодамо тонь чачома пизэть? Ламольть эйсэнзэ левкскетнеде? Ламот ванстовсть? – паморькске кашт, ды пшкадсь Натуш, валтнэнь лодорсо певердезь. Истямокс, капшазь, марявсь Теряйнень Натушонь кортавксозо.

– Монь... Мезе монь... Ветенек авань ульнинек: колмо тейтерть ды кавто цёрат. Ветенек войнадо икелень видесть. Вете... Аволь кода ней – вейкеськак а муеви! Мусызь, таго кажо – ламонень удем мартокс, ломанекс а кепедеви, – Теряй козкстась, таргась понксонь вить зепстэнзэ пачине, нардтнинзе турванзо, ливезденть – конянзо, нерьгстызе пациенть, састо нолдызе вить кедензэ, тарказонзо.

Бусось кисэнтъ та-кодамо авейкетъчидентъ аламнеде нулк-чирть тейсь, ды Наталень вить пилензэ велькссэ черень кавшаня пакшкесь токась Теряень чамабокас. Пачканзо цёранть ютась чевте лембине налнэ. Истя сон вечкевсь! Ано-

коль энядозь серьгедемс ветицанть: варчик, ялгай, чиремтик бусот омбонькирда!

– Вай! – лиссь Наталь-Натушонь кургсто тандадомадонть, ды кавто кедьсэ автордась икелензэ кшнинь недентень. Кишк шка – оймась, кортазевсь допрок лиядо: – Тонь, содави, чинек-венек музгордиця ни, эйкакшт... – валонзо ёвтынзе апак эрязкале, явнозь. Мезде-бути арсезевсь. Конинзе сельинзэ.» Сыргозсь», чиремтизе прянзо ды варштась, учозь, вакссонзо аштицанть чамас. Лыказевсь, полавтынзе пильгень тарканзо.

– Неят, тень аволь колоньгемень, аволь ниленьгеменьгак, секскак... – пейдезь ды теке прянь шназь ушодсь Теряй. Вановтозо эртевь аванть цивтёрдыця вановтс, – секскак, кода монень маряви кевкстнемс а мезть. Истя, монь ялгинем?

– Нолдык чумом, невак кевкстема, пиций... Эрят-арась тон нить марто? – видьстэ, аволь пулонь кайсезь, кевкстизе авась Теряень. Мерсь ды сускизе, алце турванзо. Варштась бусонь вальмаванть ваксканок уиця пижестэ оршазь чувтотнень-куракштнэнь лангс. «Каня истя, визьксэнь апак сода, пшкалить? Кодаяк седе стамбарнэ эряволь, мон теке узерекопорьсэ...» – янксезевсь эсь пачканзо Натуш. Янксек-иля, валось аволь нармунь.

– Мезекс те теть? Ну, эрян... Мейле мезе? – ливчанясто келемтинзе панжадо коморо кедензэ мештензэ икеле, вейкеньсэнтъ кундась икелензэ кундамонтень, омбоцентъ путызе кумажанзо лангс. Эзь туге Теряень мельс. Мик кодамо-бу-

ти навола ёжо пачканзо ютась истя набойстэ, апак визде ёв-тазь кевкстемадонть.

– Истяк, – лия мезеяк эзь муе ёвтамс Натуш, тень мерезь, одс велявтсь вальманть ёнов ды одс педявтызе вановтонзо тона ёнга сиземань апак сода удалов кадовиця кизэнь пейза-жтнес.

Ваны, а сельмензэ икеле аволь сравтневезь паксят, аволь чувтонь пиже лехат, а алкине кузтемпень чалгавкс лангсо озадо аштиця лунь ашо пря сыре авазо. Учи, чить лови, зярдю пачкоди, кецневтьсы тейтерезэ, марясы вайгелензэ. Лангсон-зо раужо паля, кедьсэнзэ мандыне. Икелензэ лугиненть лангсо уды, венстинзе псиденть пильгензэ, Ашакай пининезэ...

Кортамотне кавтотнень ютксо зярс-бути эртевсть пирявк-сос.

– Таргицят? Косто-бути махрань чине маряви, – сыргозсь, сорнозевсь прок тандавтница ондо, лутызе вановтонзо розень-товсюронь зярс пижела тюс паксятнестэ ды варштасть, ютавтызе вановтонзо икеле аштиця ломантнень пелев, – те кинь истя набойчизэ сатотсь?

– Арась, а содаса, мезе те истямось. Чинесь.., монгак ма-рия, качады, маряви, салонсонть икеле таркатнесэ ардыцят-нень ёндо, – никстясь весть-кавксть ды тертязь вайгельсэ, мельде-валдо, валтнэнь таргсезь мерсь Натушнень Теряй. Сонсь вановтсонзо яла вешнесь чумонь теицянть. Кадызе тень. Чатьмонеzewсь. Конинзе сельмензэ.

«Мезде карми сы кевкстемазо? – арсезевсь Теряй. – Вей-

кень пес тензэ содамо. Секень вант, копорян-арась, кевксть-самам».

Истя лисськак.

– Кода тон, Теряй, ванат симнеманть лангс? – каятотсь, теке цяпадизь пилююрга, ды теке те кевкстеманть Теряй сельмень конязь учось иень перть.

– Мезде? – панжинзе сельмензэ, пейдезевсь, Теряй, полавтовсь сонзэ кайксэзэ, згилязь кевкстизе эрва мезде содамо бажицянть. – Лисьмаведте, чайде, кофеде, пепси-коладо?.. Эли конадояк пальщятнестэ?

– Теке а содат... Ченькстэ, содазь, моли кортамось, – музгордезь мерсь ды нолдызе вановтонзо алов Натуш, а стакаль чарькодемс – од содавиксэзэ пеедькшни лангсонзо. Зярыя шкань перть, теке аламнеде покордавсь, Натуш вадяшась истякояк валаня, кумажанзо лангсо кирдевикс раужо цивтёрдыця юдманзо. Окойники юдманть ёзыця кедезэ оймась.

– Кода меремс, – стамбаро, валтнэнь явнозь, ней апак пеедькшне мерсь Теряй, сонсь вансь, мезе-бути редясь, икелев, – савкшны кой-зардо кепсемс цярканть. Эрямонок ней истямо – куш эрва чистэ кепедть. Вастомат-вастовомат, ильтямот, покш чить, чачома чить, фестивальть, олимпиадат, чемпионатт, чачомат-калмамот... Мезеяк а мерят: сюзавсто-эрввеласто эрятано! Секень вант, копордамонь певтеме тувталтнэ усксамизь рудаздо пешксе латкос. Эли уш ускимизь? Икеле симсть чоподачиденть, ней – валдодонтъ, вельть уш ламо содыть, эрвань диплом. Содык варчик ломаненть!

Вана истямо монь «теориям» симнемадонть.

Натуш кунсолось прянь нолдазь ды ве таркас ванозь.

– Истя, истя... Видестэ, Теряй, кортат... Теня, телефонь номерэть а ёвтасак? – эрязасто кепедизе прянзо ды апак учо ингельёнт велявтызе кортамонтъ авась; ёвтынзе валонзо ды чатьмонезевсь, каршо валонь учозь, варштась вальмава ушов.

– Мезекс? – кувтолк варштась Теряй аванть лангс ды валонтъ лангс лепштязь, мик кежтнеде вайгелень кепедезь, кевкстизе ушов ваныцянтъ. Сон талай чарькодизе, кона ёнов чиремти ваксонзо ардыця «пулынень» азоравась.

– Истяк, – велявтызе прянзо Теряй ёнов, варсодизе валонтъ ды пейдезевсь Натуш цельця тейтерекс.

– Сёрмадомка муят? – прок мельде-валдо, пельвайгельсэ пшкадсь цёрась авантень, кувакасто таргизе оймензэ.

– Муян... – валонтъ нилезь, эрязкалезь саизе кумажанзо лангсто юдминензэ, панжизе, сокарясь-тейсь ды таргась мезе эрявсь – сёрмадома кедьёнкске ды коморс кельгиця блокнотке.

Теряй чарькодевиксстэ, эрва цифранть явозь, ёвтызе номерэнзэ ды теке басом ледстизе:

– Сестэ эно тешкстык эсь номерэтькак, – кармавтозь, Натушонь чамас ванозь, мерсь Теряй, сонсь а соды мекс, вельть марямга.

– Мезекс? – ней Наталь налксезь кончтась ды пейдезь максызе теке кевкстеманть. Сонсь цирь сезсь блокноткестэнзэ

лопине, тешкстызе эсь номерэнзэ ды венстизе Теряйнень. Нерьгстызе блокноткенть тарказонзо, пекстызе – цянк мерсь – юдминензэ, конань путызе седе ёнсто элезэнзэ. Керш кедь-сэнзэ кундась икелензэ недентень.

– А содан... Паряк, маштови мезеккак, вастовтано – кун-солоса морамот аволь сцена лангсто, седе маласто, – Теряй мизолдозь саизе венстезь конёвпанкскенть ды путызе панарзепинезэнзэ. Превсэнзэяк арасель: зярдояк карми мезеккак маштовомо. Юты шка ды ёмавтсы.

Теевсь кавто ёндонь чатьмонема. Чамдовсь, маряви, гуль-какс гулдордыцятнень кулямонь, содавиксэкс теевемань паргост. Оймасть, сизесть, бешом, икеле эземтнесэ морыцятне-як. Энгамсть вайгелест. Теде седеяк виевстэ поладызь велувонь кувака морост бусонь капшиця-капшавтыця чарытне ды чаравтыцяст. Тандавтница-калдордыця моросост марявсь мезе-бути лангс пеняцямо ды теке марто та-кинь сялдома.

Шкась мольсь. Мезе сиземась – сон а соды. Мелезэяк арась содамс.

Кортамотне кортавсть, моротне моравсть. Веенстнэ, сизезь, чатьмонсть, лиятне нувсесть, неявсть удыцяткак. Курок бусось пачкодсь ошонь автовокзалонтъ икелев. Эрвась бажась седе курокке лисемс. Меельцекс кадызь бусонь стака коштонть Ёгань Теряй ды Черькаень Наталь.

«Черькаень, – сась, сонськак а соды косто, Теряень пряс мелесь бусстонть лисемстэ. – Натушонь нурькине, чевтине-

стэ-куроксто ёвтавица лемезэ, кода ютавтови эрзякс, содаса а вана кудодемest... Лисни, буесэст кие-бути ульнесь черькиця, озадо а аштиця, лыкиця. Ютась шка, ламо иеть, паряк, аволь ве пингеяк, ды те валось теевсь кудодемекс. Истя-аволь – содык снартык!»

– Ну, мезе, тейтерь, чива-кудова? – паро кайкссэ, нардев гайги вайгельсэ путсь Теряй пе вейсэнть ардомантень. Сонсь оржа вановтсо кивчк варштась аванть чамас, сельмс, кирдевь вановтонзо теке тейтерень рунгонзо лангсо. «А сон алкуксккак аламнеде мондень алкине», – меельцекс тешкстызе эськанзо Теряй.

– Мон а содан, паряк, кодаяк вастовтано, паряк, арась, а вана те вейсэнть ардомась, седеяк – «калярдомась», кадовить паро, астувтовикс ледстнемакс, – ёвтызе мелензэ Надуш. Максызе, мизолдозь, лепштыамс кедькоморонзо, кивчк варштась Теряень сельмс ды текекс явовстькак. Эрвась тусь эсензэ киява эстензэ.

Кеминь, учить эйсэнь маней зорят...

Ютасть малав кавто иеть. Ёгань Теряень эрямозо велень советсэ кемекстазь нинзэ марто мольсь, кода кортыть, чикор-лакор. Чи юты – сёвнома, омбоце сы – теке, пси тол ацирьгалемат, стяконь кис инзамот, седеень раздий аксунгалемат... Те а истя, беряньстэ, тона... А тезэнь озыть, а тона ёнов варштыть... Савкшнось натой лиснемс вензэ лангс удо-

мо шабратненень, невак та-ков. Весть таргонь перть удсесь ялганзо кедьсэ.

Истямо «уцяскадо» пешксе кудосо ютавтсь пингензэ Теряй ие, омбоце, колмоце... Эзь сода цёрась, мезе теемс, кода улемс, кода кацтамс, кардамс ордакш нинзэ ордакшкалемадонзо. Мель путсь совавторс кудозост валдо, сэтьмечи, вейкень-вейкень чарькодема. Тень таркас...

Кирдевсть превсэнзэ мельть эйстэнзэ допрок туемадо-як, вешнесь газетава-кува адрест, кие нолды эрямо. Мукшнось, Ансяк кинь мельс туи кодамояк чеерьваря колмо нупалень квартирань таркас? Истят мельтькак содавтнизь: кие теть карми лия таркасо пидеме-панеме, мельгат лопавтнеме-муськеме? Муемс истямо пизэ...

Эзь лезда оякчисэ, апак сёвно эрямонтень, седеяк меельце шкасто, нинзэ эрва палманентень кулелямозояк. Кинень, кодамо аванень ансяк эзь «педявтне»! Вансь, прок пшти сельме мучказ, эрва эскельксэнзэ мельга, ков мирдезэ, Теряй, мельганзо сон, низэ; ваннось, «никсесь», пельсь, вантсь, илязо сюлмаво полазо лия ава марто.

Зыян кандсь теяк: сон эзизе сода мирдензэ келенть, кортась рузкс. Те эзь вечкеве Теряйнень, меельце иетнестэ свал кирдевсь эйсэнзэ те ёжось авалгстовикс кевпоколекс. Седеяк, зярдо сонензэ савкшнось вейс пурнавозь зярыя эрзя ютксо кортамс рузкс.

«Те кодамо эрямо?..» – ризнэзь арсиль, онкстниль эсь пачканзо, зярдо раужо сувокс валгониль икелензэ кудонь эрямо-

зо, зярдо ёміль эрямонтъ зэмезэ, зярдо цяксадыль ды анок эрсиль явовомс эрямонтъ марто.

«Мекс, алкуккак, а кадомс седеень раздиця, тоначив па-ниця кежпаргонть? Эйкакштне покшт. Эрьвань эсензэ кизэ. Весеметь, мейсэ сюпаван – содамочисэ, тевсэ, седеймаря-мосо, – максыя тенст, ней мон сыненст истя, кода икеле, а эряван, куш варчния тетявтомо эрямонтъ танстензэ касмо-до верьга – аволь медь. Мезе эно кирди? Эрямо тарка? Ава-ломань? Тертень таркас олячи? Маряви, теяк, тонаяк. А ой-ментень эряви, оймесь веши сэтьме, валдо эрямо. Эно ме-зень кис сынъ моданть лангс?».

Истят арсематнеде, конатне эзизь стувтне цёранть, ледсь та-кода мелезнэ Эрзянь кезэрень пингень Покшчистэ вей-сэнъ ардомась, авась, конань марто кортнекшность кувака кинть перть ды конань телефонозо, ледстизе, ванстовсь, се-кень вант, эрямо таркань книгинесэнзэ.

Учизе, зярдо кудось чаволь, книгинензэ марто ютась те-лефононь стуворнэнтъ ваксс, кепедизе почконтъ ды талнозь, пельсь, кияк илязо сова, илизь стардо, кочкизе эрявикс но-мерэнтъ.

– Шумбрачи, Натуш! – тошказь-сорнозь пувсесь валонзо вить пилезэнзэ лепштязь почконтень Теряй.

– Мон, мон. Те кие? – каятотсь аламось аштезь, почкосонтъ кашторксонь пачк, содавикс човине, гайгиця вайгелесь; ма-рявьсь истя, мерят ломанесь кортась шабра кудосто.

– Те мон, Теряй, эли стув... стувтымик? – омбоцеде седе

марьянга, талномадонть кокныця вайгельсэ ёвтынзе цёрась валонзо ды нардевстэ, седе марявозо, лепштизе пилезэнзэ почконтъ.

– Кодамо Теряй? Те кто... косто? Кто истямось? – эль кирдевсь пильге лангсо, колызь цёранть ёжонзо неть кевкстематне ды ютксост «кто» – сь.

– Ды мон, мон... Вейсэ ардокшнынек Аловелестэ... Эль стувтык Озномань покшчинть? Кавто иеть ютасть. Ледсь мелезэть? – якстере тус телефон марто стуворонтъ икеле аштезь, сорнозь, верьга вайгельть ледстнесь Ёгань Теряй уськенть тона песэ кунсолыцянтень умонь шкань вейсэнъ ардомадост.

– А-а-а... Оно ки-и... Ледсь, Теряй, ледсь! Беряньстэ марявить, валтнэ сезневсть! Кодамо паро куля ёвтавить? – цёковокс, марявсь, цёкордсь авась эрямо эли, паряк, важоме таркасонзо. Теряй вить пилесэнзэ кунсолось почкосонтъ кашторксонь пачк марявиця вайгелентъ, кершсэнтъ – ва кияк илязо сова. – Мезе меревлить, Теряй?

– Истяк, мезеяк арась, понгсь сельмень икелев телефонот ды прынь мельс гайневтемс, арсемс шумбрачи. Те каня аволь паро куля? Эзить стувто Покш-чистэ тыц пешксе буссо вейсэнъ кортнеманок? – Теряй ёвтась ниле-вете валт эседензэ, мерсь «вастомазонк» ды путызе тарказонзо кедьёнксентъ.

Цёранть кедензэ сорность. Чамаумарензэ палозь палсть. Теке сядиксстэнзэ нолдась стакадоjak стака канст. Кувакасто лекстясь ды озась стувор экшс, кундась конёвонь сезезь

тевезэнзэ.

Теряй ды Натуш ютксо вастовоматне, таго телефонь пачка, поладовсть. Мольсть салава нурькине кортамосо зярыя ковонь перть. Шкань ютазь вастневсть сельмеде-сельмес. Малавгавтынзе, седе виде карми меремс – вейсэндинзе Теряень ды Наталень... Теряень коень-закононь низэ.

Тевесь ульнесь истя.

Весть ниле-вете ломанень промксесэ, косо кортамось мольсь эрзянь келенть ёжодонзо, кулялопань нолдамодо ды конань ветясь Теряйде комсешка иеде од ава, квартиранть азорозо, апак учо келес панжовсь кудокенкшесь ды даволкс совась кежтнеде лакиця-пургсиця Теряень низэ. Сон весень пингстэ карциганокс каявсь мирдензэ лангс, аноколь сонзэ сезнемс. Каявиксэль промксонь ветицянтъ лангс, кинень кулелясь мирдензэ. Эзизь нолда, кирдизь цёратне, мель путсть оймавтомс аванть, совавтомс превс, кардыксэлизь. Мезеяк эзь лезда.

Берянель, визькс ульнесь те идем, ордакш сценадонть нупальсэнтъ улицятненень, седеяк визьксэль Теряйнень. Сон аноколь туемс нинзэ юдмасонзо лангозонзо ахолямодонтъ, превстэ лисезень палыця вановттонзо модань пачк. Эйсэнзэ даволкс велясть нусманя-ризкс ёжотне-мельтне.

Лиссь лиякс.

Кулелямодонтъ майсевиця Теряень низэ цярадизе кенкшентъ ды тусь капшазь кудов. Мелензэ топавтызе – «стардызе» «злыдарь» поланзо. А Теряй аламос аштезь лиссь мель-

ганзо ды сайсь ки Черькаень Наталень ёнов, кинень яннэсь шешкезель.

Тусь эсензэ лембе-келей пизэстэнзэ, таркастонть, косо чачсть-кассть кавто цёранзо, тусь зярдояк-зярдояк а веляв-томга. Теемс истямо эскельксэнтъ ульнесь ашождыне, те кандсь ламо стакасто ды шкань таргсезь аютыця седейризкст. Кадомс пиземеде-даволдо ванстыця потолоконтъ, лембень кирдиця стенатнень, весементъ, мезесь тонадовкшнось ламо иень перть, кадомс эйкакшот – те мештесэть стака, алов ускиця кев куломазот. Прялить явоманть эрва кода: эрсить эрямостонтъ туематкак.

Ульнесь те ламо иеде икеле сундерьковонь куншка шкава. Састо-састо чаразь-велязь, теке мезде-бути арсезь-меляв-тозь, вельтясть моданть чевте покш ловнетне. Мольсь васень лов. Китне, латотне, чувтотне вельтявсть кецневтиця ванькс ашосо.

Апак капша эскелясь Теряй ашосо копачазь кевъянганть Натушонь кудо ёнов. Прязо эль эзь сезеве калгодо назой ар-сематнеде, эвтезь эвтсть нусманя мельтне: «Видестэ-аволь теян – эскелян те кияванть? Кирдян ки, косо учить? Мезе тень канды вандинь чись? Па...паряк, мурдамс? А? Ков? Мизолксонь, пеедькшнемань таркас пижнематнеде-ацирьга-лематнеде пешксе стенатнень юткс?».

Се ашо-нусманя чись ванстовсь Теряень седейсэ теке ис-ень чись, ды сон, се ашосо артозь чись, кадови раужо ледст-немакс Тоначив туемазонзо.

Од пингестэнзэ Теряй косто-бути ловнокшнось: ломанесь уцяскав сеньсэ, а соды, кодамо уцяскавокс тензэ улемаль. Мертяно, цёранть, седеяк, маряви, аванть, пазось эзь максо чачтнемань талика, дёп. Содавольтькак сынь, кодамо те уцяска – шкинемс, вайдамс, кастомс пакша, – секень вант, кой-кить... ормазкадовольть. Иди теде – ...асодамось.

Теряй те ёндо ульнесь уцяскав. Эйкакштнень чачомаст казть тензэ чансть, казть покш-келей, чиревтеме мастор, конань, кармась содамо, лемезэ педагогика. Секс тензэ тень кувалткак стакадоаяк стакаль перьгедемс эйдень-эйкакшонь вечкевикс куростонтъ.

Кие содась алкуксонь тувталтнэде, конатне ветизь Теряень ды нинзэ, веёндо ванозь парсте, ояксчисэ эрицятнень, явоманть? Ансяк сынсь. Асодыцятне, ланга-верьга арсицятне сеске сюлмасызь вечкеманть марто. Келя, Наталь-Натуш эждизе умок урвакстозь, умок аволь одтнэде цёранть, чаракавтызе, колдовизе-мунизе.

Вечкема... Сон, келя, чумось. Ды сон, варштындерят седе домкасто эрямонтъ лангс, истя, паряк, уляк. Эно кие? Зяро сондензэ морот моразь, книгат сёрмадозь, пьесат-фильмат невтезь! Эрьвась ёвтни вейкеде: сондензэ мазый виев неже вейсэнъ кошонь пурнамсто, полыямсто мезеяк арась. Вечкемась, кемевтить, – вейсэнъ эрямонтень кевень юр. Сондензэ «тантей», нардев, келя, иля вешне. Э-эх! Улевельгак истя, кода сёрмадови-морави, – зняро явицят, зняро урозэйкакшт, ськамо, цёравтомо эриця ават авольть майсе, зняро

сельведень эрькть моданть лангсо аволь уле. Вечкемась, умок эряволь видькстамс, – те прыця тештень кивчкадема эли валске мартонь сув. Варшты пси вановтсо чипаесь ды панжови мезе кекшневь...

Паряк, те оргавтомо сусласькак, конанень мерить «вечкема», лездакшнось зярд-бути валовомс кавтотненень вейс. Паряк... Секень вант, Теряень превстэ а тукшныця мелеськак – куш иешка эрямс олячинь валдосо, а марямс кежтнеде каргоць, лиясто кижнэзь пижниця вайгель, седеень пупсиця валт – лездась тенст васодевемс Натуш марто. Шумбрачинь пултыця кежтнень-сёвноматнень таркас, марявьс сестэ Теряйнень, кармить кецневтемензэ кенярксто пешксе вановтт, мизолдыця турват, чевте, седеень эждиця валт... Кода эрямс паронтень апак кеме?

Бульчом, ломанесь уш шкинезь истямокс: кеми валдос, уцяскадо, чанстте пешксе эрямос. Мезень кис эно, синтемест самс, кадык аволь свал лембе, аволь свал важов, моданть лангс? Ченярдомо-ченгеме? Чинев вецана чеядавкссо ботамо-шлебердеме?

Нимилявнекс ливтнесть ды эцнесть лавтов лангсо ловажань кудынентень мельтне: «Эрямот, Теряй, кемть, карми арсезенть кондямокс: ванькс, сэтьме, вейкень-вейкень марязь, вейкеде-вейкеде мелявтозь, олячинть танстензэ марязь...». Лиякс сестэ эрямонзо эзизе нее. Кемсь цёрась, кемсь, кемсь.

Истя ушодовсь Теряень од эрямозо. Лия кудо, лия сте-

нат-потолок, лия кенкш, лия стувор, пенчть... Лия аваломань, лия вайгель, кортамот... Допрок, вейкень пес лия!

...Кода-бути весть, телень сэтъме ашо чистэ, совась «Вайгель» газетань редакцияс Теряень кирдажозо, кулялопас свалшкань сёрмалициясь-поэтэсь Панькин Миколь. Теряй скамонзоль. Стувор экишэ витнесь – псилгалесь – печатазь такодамо текст. Витнесь, кода икеле кортыльть, гранкат. Миколь апак кйсе лоцьк озась каршонзо. Саизе прястонзо шапканзо ды путызе кумажанзо лангс. Ловныцясь кадызе ловноманзо, саизе Миколень кедьстэ сёрмадовксонзо. Вановтозо кирдевсь лемензэ лангсо. Турванзо явовсть мизолкстонть. Ловномонзо эзь карма.

– А содан мезе, кодамо сюпавчи потсонзо, лемень кувалт видьстэ мерян тетъ: кеменьс понгить, эрявикстнэде эрявикс! «Рудаз», видькстак, ламо эйсэнзэ, койме эли коймине тень анокстамо? – пеедькшнезь, сыцянтъ сельмс ванозь мерсь «Вайгелень» прявтось ды путызе Миколень «шедевранзо» эрявикс кувтас.

Кортазевсть пиреде-менелькстэ, теде-тонадо. Ледстизе кулялопань свалшкань авторось Теряень од латало эрямонзо кулянтъ.

Теряй мезеяк эзь мере. Стясь таркастонзо, зярыяксть ютась, кедензэ удало кирдезь, нупальганть мекев-васов, варшась стуворонзо икеле озадо аштиця цитница касмо Панькин лангс ды мерсь тензэ:

– Кода тон, Миколь, арсят, темась те, полыямодо, сравтне-

виця? Эрявикс минек кулялопантень? Мезекс те тонеть, лиятненень, кода мон эрян-пиштян ят лато ало? Мезень лезэ? Кельть човсемс? Мертъ, кортамонок теде пекстазь, – превть макссь ялганстэнь Теряй ды озась тарказонзо.

Эсеть эйстэ а туят

Кинень мезе, яла мерить, Инешкипазось кази. Кинень куломазонзо резэмс коник лангсо, чивалдос а лиснемс, кинень экшелямс чанстень эрькесэ. Кинень мезе... Вейкесь кувака-казямо иеть ютавты, тарди-мелявты панжома экшсэ, омбоцесь – эри-важоди олячисэ, топавты лезэнь, кенярксонь кандыця тевть. Кинень мезе...

Черькаень Натуш вечки эрьва мезень таштамо. Мезе понги кедь малас – сонзэ. Чеменев эске, ёртозь картъ, лавсь, лазпеть, суликат, эрьва кодат квитанцият, оршамот, кедьгеть... Кодаяк а нардасак трямкань обуцядонть ярмаконь таштамонткак. Машты, машты трёшникень тееме-ванстомо...

Ламо иень перть пурнавсть кармотнеде-курмотнеде аволь аламо. Веенст понгавтнезь кескавтнева, лият путнезь эрьва кува чавнозь лавсятнева, ламо кой-мезть нерьгстнезь эзем ды коник алкстнэва. Сынъ кирдевить кудосо, кудыкеле, латало. Зярдэ мезеяк эряви муемс, вешнек чоп – а мусак, эли дух а муеви, ёми.

Вестъ телевизорсь ёвтнесь-невтсь Америка ёнксонь аволь сыре, куншка иень, ськамонзо эриця авадо. Сон май-

севсь таштамонь ормасо. Кандтнесь квартиразонзо эрва ёндо эрва мезть зняро, эзь кадново тарка, косо удсемс, а кува ютамс, эль лисневсь кудостонзо ушов. Эрямо тарказо тыц пешксе ташто, аэрявикс, яжавозь, ёртозь кармодо-курмодо. Эзь сода пайстомо авась, кода улемс, мезе теемс. Аволь весть пачколесь сельведень нолдамос. Лезэ? Кодамояк! Кортак-иля, мурнек-иля, лезэ иля учо – орма. Те ансяк мереви – пазонь казне.

Те аволь кецневтиця сюжетэнтъ Теряй ды Натуш ваньзы телевановтсто вейсэ. Теряй кемсь: невтезесь кармавтсы нинзэ лиякс ваномо эсь «орманзо» лангс, а карми кандомо кудонтень мезе понги сельме икелев. Сеске сон тензэ мезеяк эзь мере. Ютасть кавто-колмо чить, ды зярдю низэ косто-бути усксь эйдень нилень таркас колмо чарыне лангсо янгазь чарынькай, эзь кирдеве: ледстизе ванозь «кинонтъ».

Кавонест атят-сырькайтъ кочкасть ведьинзейть. А пек кецневти те тевесь. Вельть пупицят ацавиця нетькссэнзэ салмукскетне! Верь пупскесэ вельтявить кедеть, а оршиндерят калгодо коцтсто стазь кувака ожа панар, кедезэть – варьгат. Сень кис курооксто пешкеди кедьгинеть – а налкстават. Кочкак. Теряй эскельдясь нинзэ малас ды пшкадсь тензэ:

– Минекак кудонок, латалксонок Американь се аванть ёнов молить. Мезе ансяк арась, мезе ансяк а кирдеви! Ней те колмо чары лангсо крандазкесь латало, умок уш тосо лавсь усксеви... Мезекс пурнык те каладырьканть, эли сизьгемень иесэть чачтомо арсят? Латалкось тыц, – снартсь

атясь превть максомс, мерсь пелезь, лепштязь вайгельсэ – илязо цяраде пурьгине. Арась, истя, кецневтизе, эзь лисе. Маряви, кинось, куш кенжинень покшолмасо, – лездась. Атянзо мереманзо – нилинзе. Вал эзь правто. Ялатеке пазонь «казненть» ёртомс шукшпряс тензэ ульнесь ашождыне.

Ковгак а молят: кинень мезе...

– Мезекскак ды маштови, яла думаян, – кода-бути зярыя шкань ютазь, таго пупиця инзеень кочкамсто, тевензэ апак кадо мерсь Натуш эсь прянь идемга. Ёвтынзе валтнень сэтместэ, апак машинете, прок чумонь марязь. Ёвтынзе ды венстизе вить кедензэ верев, вановтонзо икелев понгсть инзеень зярыя раужо-сэнъ цюцёвт.

– Те а истя, – эзь са Натуш марто вемельс Теряй, кавто ёнов чиремтнизэ прянзо, – «маштови»... Валось виде, ансяк содама тензэ онкс. «Маштовицятнеде», мезть понгавтнезь, вачказь, аравтнезь эрьва кува ды ванстовить ламо иень перть, – озязонь нерь. Астака понгомс, кода ченьксэнь эли нарконь вечкицятне, кода Американь се авась, таштамонь полонс. Кельме калмонтень кодаткак сюпавчить а эрывать, а сырнеть-мезть, а кармот-курмот...

Обуцянь те ёнкось – таштамс, ванстомс, – а берянь. Тевесь лия, зярдю пурнави-таштави мезе понгсь, апак онкста, апак сода ды апак арсе – карми-арась эрявомо косто-бути кандозесь эли муезесь?

«Косто те оймень костиця апарось педясь Натушонь обуцяс, кода эйстэнзэ менстямс?» – аволь весть, аволь кавксть-

как совсесь Теряй атянь прызонзо. Виде-аволь, марявсь тензэ, истямо коронтень юрокс ульнесь текесь: вейкинекс, вейке эйкакшокс касомазо. Паряк, гентнэ ды кодаткак лия тувталт «лездасть» тенень? Содык терявтык...

...Меельце шкастонть кудазоравась чапсь истямо кой: кофе велькс марто симемс чизэнзэ весть. Валске марто ярсамонь прыдозь. Ансяк. Чикуншкат, чокшне – арвочине ведь, компот, чай эли ловсо. Кой – улияк кой. Сонзэ, вадря-берянь, топавтома. Ансяк вана...

Теряй атя умок-умок майсеви верень ламбамочиденть. Кирдить, ванстыть эйсэнзэ таблеткатне ды диетась. Секскак сахар марто а мереве симемс-ярсамс а тезде, а тонадо. А каят кофе кечинезэть сахар пельнернесэяк! Диета... Ансяк те симемапеленть, седеяк велькс марто, ули, кадык лавшине, танстезэ, чинезэ, совавты, текенекс, эйзэть потмовий. Секс сон вечкеви атянтень. А тесэ – кой!

– Содат мезе, монень чизэнзэ кавксть эряви, – яволявтсь Теряй весть валскень ярсамсто, вакссонзо стувор экшсэ озадо аштиця Натушнень. – Пельпенчке яжавтозь кофе ды пелькечине ансяк лаказы ведь, монень саты. Яла тансть, яла аволь кода чаво пси ведь пансят. Куш тень эйсэ седеенть витемс.

– Арась, арась, ансяк кода мон меринь! – цяр путызе ды шаштызе апак прыдо кофе кечинензэ Натуш; мештензэ икеле вить кедень сурсонзо юхаезь, мерсь кшнинь вайгельсэ, пря максомо эзь арсеяк, кирдсь эсензэ: – Чизэнзэ весть ве пенчке! Вот так вот!

Теряй лангс путсь пшти сельме, вансь мельганзо покш
пря коршокс – мерезденть верьга атясь илязо симе. Марясы
икельце кудосто эли косто лиясто сиянь пенчкенть чольдер-
деманзо эли чайникенть тыжнэманзо, сеске чи, эли каяты
кудонть келес: «Тон таго кофе! Зяроксть теть мернинь... Дух
не слушается...».

Теде мейле ушодови урокось кондямо: «Мон уш теть
ёвтнинь телевизорсто марязденть, ледстнинь – свал кофе-
де симнезь, ломанесь тееви кофеголикекс. Теяк – питнезэ
те симемапеленть... Содат. Аволь кода чаенть. Те истя зяро
целковойть «симневить» ковозонзо? А иезэнзэ?! Думаешь?
Сайть ручка, озак ды ловт!».

«Тееват кофеголикекс» тандавнеманть Теряй мезекскак
эзь лово, пеедькшнесь ансяк. А вана ярмакось ютавтомадо
Натушонь ледстнеманзо, «озак ды ловт» валтнэ совсесть ме-
штезэнзэ чеменев изамо пеекс.

«Мекс, мекс сон, Наталь-Натуш, – кирдсь мельсэнзэ, яла
кевкстнесь эсензэ Теряй, – эрямонть мазычинзэ-питней-
чинзэ онкстни ансяк ярмакось таштамосо? Оймесь косо?
Меремс тензэ? Пшкалинь. А лезэсь? Мезеяк полавтовсь?
Арась. Пазось, тагояк мерян, максы эрьванень сень, мезе
максы. Лиякс а велявтсак, а путсак.

Саик, невтемань кис, Паксютонь Алёнь, Пичепесэ, эйст-
энек кемень кудонь трокс, эри Груня нинзэ марто. Допрок,
тунь, дух, а яви мель ярмакось пурнамонтень ды ютавто-
мантень. Зяро ютавты сон эрьва кодамо журналонь-газетань

сёрмадстомга, зняро аволь велесэнтъ, буесэнтъкак а ютавт-
тыть. Паряк, а эрявитькак зняротне, мезекс? Те кевкстемась
инжекскак тензэ а пачколи. Мезе илязо саво рамамс, пит-
не кевкстни чуросто. «Мезе эряви – эряви, рамама», – вана
сонзэ мелезэ-коезэ. Алё а лови ярмаконтъ эрямонь кузте-
масонтъ весемеде сэрей чалгавксокс. Ды те пек паро! Алё-
Алексей а лови эсь прянзо урекс, ярмаконтень нулгодькс
савтницякс, а сорны поень лопакс эрьва нулав целковоентъ
икеле, а озны. Икелечидентъ верьга-ланга а мелявты. Зепен-
зэ чавот, сень кис оймезэ валдодо-ваньксчиде пешксе. Ис-
тятнэ, сюрморкс айтязат, вастневить эрямонь килангсонть
аволь сеедьстэ. Педес-пес видестэ ёвтазь: «Эсетъ эйстэ, седе,
мезе тетъ верде максовсь, а туят».

Каня сельметъ таргизь!

Астяко ёвтазь: эрямонть эрямс – аволь паксянь трокс
ютамс. Аламнеде лиякс ёвтазь: ломанентъ содамс – аволь
вайгельпе ютамс, ютама мартонзо латкова-луткова сядо эли,
паряк, тёжа вайгельпеть.

Ульнесь кизэнь маней валске. Пичеледе авасоло пандо ал-
га чудиця леентъ велькска-чирева, зярс эзь кенере келейстэ
варштамо чись, удомаст явавтнестъ сувонь кельме пельть.
Пиресэ эмежтне ды умартне лембе, састо ды кувать моли-
ця пиземедентъ ургатетсть касомо – виень-потьмежачинь та-
штамо. Сынъ кецнестъ ды эсь пачкаст кучнестъ сюрпря летъ-

кень кучиця менелентень, лембень раштыцянтень.

– Кодамо коштось ванькс! Лексят лексевлить. Течи вальсемат модамартне, шкаст, чинь-колмонь ютазь потмозост а совават, – ледстизе Натуш, удомадо мейле кургонь автнезь, ансяк кавонест Теряй марто лиссть кудосто ды валгсть кузтемпес. Аванть лангсо каркске марто валдо-пиже човине коцтонь вень кувака паля. Секс валскень экшеденть эзь аштеве, мерсь мезе-бути эстензэ марямга ды юрк совась, теке чеерь варязонзо, кудос.

Теряй кундась тевс. Васняк тонгсь резинань кемть. Совась панжадо кенкш латалов, сайсь модашка. Келейстэ эскелязь ютась вальмало путовкс «умантень» ды кундась мерезенть топавтомо – вальсеме. Кирда, модакикс, мельганзо омбоце, колмоце... Тевесь мольсь. Зярдэ тесэнь путовкс «паксясь» прядовома маласоль, састыне сась теке удомань оршавксонть Натуш.

– Те зярс эзик прядо?! А-я-яй... Лыкама седе, лыкама... Мон арсинь... Капшак. Пиземе илязо туге. Мейле а соват. Вот так вот! Несак, зярошкат кассть? ... Ярсамо ады, – паро ёжосо черькстась прясонзо, кончтась ды прядынзе кармавтоманзо. Теряень апак учо велявтсь ды сыргась, пиже янганть нурькинестэ эскелязь, кудов. Модемстэ кайсесь превсэнзэ, кодат тевть теема течи васняк, мезе тантейне, седеень витиця путома стуворс чикуншканень. «Тевтне – тевть, а пекесь соды эсензэ!» – марямга прасть кургстонзо валтнэ, сонськак эзизе редя.

– Прядса икельксэм, сован! – серьгедсь мельганзо Теряй, колызе валскень гайгиця экше каштонть, ды поладызе барцаеманзо, мель путсь седе парсте вальсемс модамарень эрва куракшкенть. Кошtosь экше. Тень лангс апак вано, кутьмерезэ ялатеке начксь панартомояк.

Эзть юта вете минутаткак, таго вайгель, ней кудоужосто, веёндо:

– Кежень илить савтне! Кеменьксть эждеме а карман! – серьгедсь ярсамонь анокстыцясь ды выр-вар тусь эрямо пизээнзэ.

Мельганзо, кадызе тарказонзо, модакиксэнтень, модашканзо, сыргась, стакасто эскелязь, вальсицяськак. Кузтемпе-сэ каинзе пильгстэнзэ рудазов карсемканзо, оршизе панаронзо.

Ансяк панжизе кудокенкшенть, стуворонть вакссо стядо котьмиця низэ варштась совицянтъ лангс, ледстизе:

– Кедеть шлить? Аволь, аволь тесэ – ушосо. Вант, иля пургсе, таго монень сави мельгат нардтнемс. Кедеть нардтнить палманентень эскс понгавтозь нуласонтъ.

Те «инструкциядонть» мейле Теряйнень савсь лисемс ушов. «Фу, допрок стувтыя теемс тень сеске!» – ютась пряванзо, янксезевсь. Сон шлинзе-нардынзе кедензэ, топавтызе кармавтозентъ ды апак эрязкале совась кудос.

– Озак! – нулновтсь прысонзо ды невтсь сурсонзо озамкэнтъ ёнов азоровась. – Каян сывельям. Печксек кши. Аволь, аволь те пеельсэнтъ! Оно сеньсэ. Човинестэ бажак! Конёв-

неть мекс эзить сравтне? Теньгак тетъ ёвтама...

Теряй керсесь кши, таргась стуворпотсто пенчть, кандсь тона кудосто нинстэнь эземне. Окойники озасть стувор экшс.

– Мекс конёвнетнень пест эзить мендя? Паморькстнэ киякссо улить! Каня, а чарькодеви, каня эзинь мерне? Кинь учат? Пенченть, пенченть мекс аволь сень саик?! Ваканот седе малав шаштык! – прок эрямо парьстэ валозь валовсть Натушонь кургсто кармавтоматне ды превспутоматне, эйстэст, секень вант, тармазкатат. Кода кирдсь сынст атясь, а чарькодеви.

Теряй чатьмонсь. Сон содась, пе те «уроконтень» карми а курук. Пенчезэ ды пейсалазкензэ содасть эсест, чевелясть – пештясть пеке. «Уроконтъ» кувакачидензэ теке ведьс вансь.

– Вант, паморькст иля правто масторов, комак ваканонтъ вельксэс! Текень содан, эрва чистэ мельгат ветексть тенсян, вот так вот, – ярсамстояк эзь чатьмоне, превть макссь, яла тонавтсь, кармавтсь стуворонь прявтось. – Саик, саик турваужостот педязь кувинентъ.., во-во, текень учинь, – кедькоморсонзо... Ну кие, кие истя тейни? Каня а чарькодеви – сурсо саема, сур песэ! – тень мерезь, венстизе вить кедензэ ды невтизе кода эряви – невтий сурсонзо нардызе педявксентъ турвастонзо.

Стуворонь азоронтъ моронзо кунсолозь, Теряй сэвизе сывель марто модамарьям ваканонтъ, симизе кечине кофензэ, ёвтась сюкпря ды чатьмонезь лиссь ушодозь тевензэ прядо-

мо.

Вальмало «уманзо» прядомадо мейле ютась умарьпиресэ путозтнень вальсеме. Сынь озавтозь байтяк шкань ютазь. Вишкинеть. Шкасткак эзь са. Эйстэст ветешкатнень пирень прявтось нерьгстынзе човор газононь тикше марто. Эль-эль неявить. Вейкень Теряй эзизе редя, цёх керизе, керявозь мо-дамарень нетькскетне вельтявсть модасо.

Тень Теряень вакска яннэванть састо модемстэ неизе азо-равась. Неезdentь Натушонь ёжопонанзояк стясть, пачканзо кивчк ютась псинь нал, соракадсь, теке маштыкс куродызе. Сельмесэнзэ кивчкадсть-чийнезевсть кежень сяткот. Сон ва-чо вадовокс каявсь каршонзо стядо, модашканзо лангс неже-дезь аштиця лов ашо пря атянтъ лангс. Аноколь раздемс.

– Кая а неят, мезе теят, кая сельметъ таргизь?! – кежт-неде сорнозь, пирень келес пижнезь, автордызе атянтъ кедь-стэ модашканть ды весе вийсэнзэ, теке превстэ лиссь, вередемсь невтемань кис яхоеме-вальсеме. Цят шка – илыкезэ маштсь. Варсодизе псинзэ пачк модашканть Теряень пиль-гензэ ваксс ды поладызе тонавтоманзо ней уш кельсэ: – Ко-дамояк тев тетъ а тееви, мезекскак а маштоват, чаво ломань, ничего тебе не надо!... – пижнезь-сялдозь, Наталья «човсе-сь» мирдензэ. Прядомакс цюх сельгсь ды велявтсь, полавты-зе мелензэ, мекев, кудоёнов.

Теряйнень эряволь сеске туемс аксунгалицянтъ икельде: а мезть кунсолумс кежсэ пургсиця ломанентъ, сонзэ ормаза моронзо. Сон сынст содасынзе. Тейсь ильведькс – эзь туге.

Марязденть-неезденть гувк тапардызе пси, эрязкалезевсь седеезэ. «Мезень кис, мезень кис?» – теке кевкстнесь сон. Прязо налкставиця мельтнеде увнось. Эзь сода, мезе теемс, ков модемс. Варштась икелензэ усксевиця модашканть лангс ды прянь нолдазь, састо эскелязь сыргась пирекуншкава янганть вирь ёнов. Сон ушодови Черькаень Наталень уличинзэ-моданзо пестэ сеске.

Торох, дух а мезень кис лангозонзо каявомась, маней мёнельксэнь келес пижнемась, прясто кочкаряс покордамось эзь максо прянтень арсемс мездеяк лиядо. Лепштясь...

«А! Полавамс эрямонь мазычинть, эрвела, ванькс ёжотнень модамарень эль лексиця нетьске лангс! Кодамо авечкема ды нарьгамо оймень ваньксчи лангсо! Кодаяк а чулгови, мекс истя? – лакасть, чавсть авидечиденть валтнэ-мельтне, кевкстематне Теряень прясо. – Кинень пшкадемс, мезе теемс?

Вирь, вирь, мекс чатьмонят? Мекс тынь, кувака рунго пичеть, вал а каятадо кисэнь? Каня а марясынк мештестэ лишиця кувсеман? Ёвтынк меленк, кода тень улемс? Саема, паряк, латалксонь стенас понгавтозь пиксэнтъ ды... Мезе лиякадовсь? Паряк, ёвтатадо мель, кода лисемс кажостонтъ? Те кодамо эрямо? Ужо-ужо... А кие сестэ, арсек, тевень топавтсынзе? Ушодозь эйстэст аволь аламо. Аволь, малавгак аволь ансяк пандянь-кардазьютконь! Лиянень сынъ а теевить, монень, лексек-пувсек, ускомат. Секскак тоначив тудемадо мельтнень – шукишпрыв. Те истя. А кода улемс вейсэнъ

эрямонтъ марто? Кода? Муемс лия эрямо тарка? Муинь... Эрямс съкамот? Теяк... Аволь макшов мукорян. Чангодть, Инешкипаз!»

Модамарень керязь нетькскедентъ таргонь перть Черькаень кудосо кирдевсь кельме кошт, коня алга варштавкст, пенень пачк ёвтазь кавто валт: «уле» ды «арась».

«Кирдемс мештесэть зняро кежть, сэредстиця, навола ризкс ёжот... – арсесь Теряй Натушонь пукштяиця, ордакш обуцядо. – Инешкипаз, каня тень туртов чачозтяно? Мезень кис аванок зняро майсесь ды мелявтсть мартонок? Лиси, сакшнотано тей вейкень кис: майсевеме.

Туемс? Ков, косо ды ки монь, сыре каргонть, учи? Косо кемемась, колмоце муевксэсь карми седе мариця ойме, валдосо гувкаиця? Илязо лисе седеяк пшти», – яла онкстнесь, яла кайсесь эськанзо Теряй, ды кода-бути ледсь мелезэнзэ умоктояк умок, тона нинть марто эрямсто, ловнозь Лев Толстоень «Крейцера соната» келей ёвтнемазо. Эйсэнзэ невтеви семиясо эрямонтъ алкуксонь «мазычизэ», сонзэ «танстезэ». Сон истямо ды невтезь истя – удомазо цёранть сезневкшнесь аволь ве таргонь перть. Эйсэнзэ тешкстави: вейксэньгемень вейксэ процентт семиятне-кудораськетне – эрить сёвнозь-тюрезь, мельга-мельцек салава ваннозь, микшнезь, полавтнезь. Стака ульнесь марямс истят валт ине философонтъ пельде.

Ды аволь ансяк Лев Николаевич! Лия сёрмадейтнеяк ёвтнесь ды ёвтнить кудораськедентъ аволь цяпамонь валт-

мельть: «зона», «колония», «палач»; ававттонть – «мучка-каз» («надзиратель»), «полон». Астяко тюрмань валт-лемть педявтнеть! Ды... педявтнить.

Секс Теряй вельть эзь правто туемс Натушто, те кежсэ-ацирьгалемасо цилькаиця эрямо таркастонть. Кирдсь кор. Кирдсь пеень сускозь, кирдсь кода маштсь...

«Тук, варчик! Семань Итёк оно сисемксть кайсесь кирьгазонзо ашко, совсесь содамокс. Сисемексть! Ундоксткак – тейтернеть-цёрынеть – кенерькшнесь зярыя таркава нолдамо. Кадык эно цёрась улевель нузякс кандо эли кодамояк меельце симагай. Покш, виев, мазый, тевсэ – сырнень кедь. Вейкесь «нитнеде» санонзо таргась, омбоцесь, колмоцесь... Сисемецесь истя карсизе – сельгсь ды ношкстась эйстэнзэ мейсэ авазо чачтызе. Оргодсь вень куншкат, ков сельмензэ несть».

Кежей Наталь, сезеви эрва штелькстэ, акирдевица кор, сень кис винапетнявкс а каи, валонзо лангсо – азор. Мезе мери – топавтсы! Уски-важоди лишмекс, сивекскак а эряви. Кудоютконь тевтнесэ – дёрдо дёр! Секскак Теряй атя лия ёнга ливтнамадо арсематнень малавгак эзинзе нолдтне.

Мезесь кедьсэть уле – уле, а редяви, ёми – чарькодъсак, кодамо питнейчи, мезе ёмавтыть. Лиясто мик ёмавтыцянтъ летькемить сельмензэяк, нолдасынзе кедензэ. Секс...

Ёгань Теряй тунь эзь чумондо Натушонь, тунь. Каня аламо цёрат-ават, одт-сыреть майсевить панжома экшсэ чумочинь кис, конань эзизь тее? Чумонь теицятне, васняк, –

тетяст-аваст. Сынь, теде малавгак апак арсе, апак сода ды апак редя, «казить» эйкакшост туртов берянь кор, анок-стыть-стявтыть нолажа киланга эскелицят, тюрмава ашти-цят. Истя лиссь Натушонь аванзо мартояк. Сон а чумо, лиссь истя – кастызе кемнилее иень перть пакшанзо колмо цёра-до мейле вейкине кольнягай тейтернекс ды казизе тензэ ор-дакшонь-аксунонь «орманть». Шкань-шкань Натуш марявсь атянтень натой жаль.

...Аволь уш истя сеедыстэ ёндолтнэ кивчкаесть ды сезнесть Пичеле вельксэ новолезь пиземень чопода тан-давтница пельтнень. Ульнесть седеень кецневтиця, маней, мизолдыця читькак. Кодамокс илязо уле менелесь, эрямось ве таркасо эзь аште.

Чинь тевтненень путозь пе. Теряй атя озадо аштесь куз-темпесэ. Оймсесь. Икельганзо, пирепеваст, ожо меште пи-четне чатьмонець учость чокшненть самонзо. Вановт кец-невтсть пиресэст пиже ябунцясо копачазь умарьчувтнэ. Ко-дат тустот ды рукшнат лопасть! Сэнь масторонть азорозо ке-нерсь валгомо оймсеме. Конизе сельмензэ ды кекшсь пичет-нень томбалев. Виренть велькска менелесь артовсь палозь пальця ожо-якстерестэ.

Сась, кода свал апак учо, прызонзо ледстнема вейке ко-вол шкастонть, зярдо паротнеде, маней читнеде потмурат-нень коряс, Натуш марто вейсэнэ эрямосост седе ламольть. Одольть...

Зярдояк а стувтови Домка эрькев экшелямо якамост. Эй-

ЭНЭЭ велестэнтъ вайгельпешка. Ансяк ютамс сынст келей лаймевантъ ашождыне. Теине, тей-тов менчевиця яннэсь ветясь тов куракш, карксамга сэрей тикше юткова, начко-рудазов таркава. Видестэ лемдекшнизь умонь эрицятне – Домка. Алкукс истя. Текеде, паряк, истямо ванькс ведезэ – сельведь. Эйсэнэ кирьгава аштезь шождасто неявить-лововить пильгесурот. Перьканзо касыть, мазылгавтыть эрькентъ ды тесэнь ёнкстнэнь, калень, эрьбань, ламарень, чевгень ды лия эрьва кодат куракшт.

...Шказоль чикуншкадо мейлень. А куш а каш. Оймсестъ чувтнэнь потсо нармунтне. Псидентъ чатьмонсть, эзь маряво тикшентъ потсто тастынетнень кайгасо налксемасткак.

Эрькечирентень аламнеде апак пачкоде, васенцекс, тунь апак визде, кайсесь, мезеяк эзь кадо лангозонзо, Натуш. Киде виздемс? Оршамонзо, венстизе кедензэ, понгавтынзе рация пешкс куронь нурьгиця тарадпес. Састыне, ёжонь марязь, ожо пси чуваронтъ ланга ютась, икелев ванозь, ведентъ малас.

Теряй понксонзо-панаронзо каямо эзь эрязкале. Стядо аштесь нидензэ авасоло ды вансь сонзэ аволь сэрей, аволь эчке, теке тейтерень, рунгонзо лангс. Вансь сельмень апак кончтне, сэвезь сэвсь вановтсонзо. Некшнизэ нинзэ эрьва кода, эрьва косо ды, содави, аволь вестъ, а вана истя, пижесэ пирязь эрькечирева, ожо чуварнэ ланга эскелицякс, эрьвела ёжосо, прясто пильгс штапокс, – васенцеде.

Зярс-бути Натуш аштесь стядо, вансь чипайдентъ цитни-

ця эрькенть чамас, аламо шкань ютазь вановтсонзо ютась ку-
ракшов, пиже кундокс неявиця, чиреванзо. Ландясь ды са-
стыне нолдызе вить кедькоморонзо ведентень. Икельганзо
тей-тов укшность вежаськедеяк вишкине сияждыця калнэть,
сэперькеть. Кечинекс кедькелензэ теезь, амольдясь ведь ды
пургизе-начтызе мештензэ. Стымсто потензэ ланга чипаенть
визьксэнь асодыця вановтто нолаштсть, теке сиянь эрьги-
неть, цитница ведьбайгинеть. «У-у-у, кодамо экшине!» –
рунгонзо витемстэ таргизе «у-у-у»-ть сорныця вайгельсэ.
Ялатеке тандавтниця кельмекс эзь маряво. Кедензэ кавто
ёнов келемтезь, прок нармунь сёлмонзо, экшентень апак то-
надо, сурневксэнь марязь, састо-састо совась ведентень –
васня кумажава, мельганзо карксамга, седе верьга.

«Вай, вы-ый, кодамо кельме! – цирнезь серьгедсь перть-
пельксэнтъ келес, сонсь варштась удалов, эйстэнзэ авасоло
палманькс аштиця поланзо лангс.

– Мезть сельметь полгарьгавтнят? Эли эзимик некшне?
Кайсек ды бырсэ ваксозон! Иля пеле, а сусктан!.. – серьгедсь
Натуш пеедькшнезь ды болдор-болдор тусь «пинекс» уезь.
Пильгсэнзэ ботамодонтъ кувтань-кувтань кепсевсть ведьбай-
гень сырнень сяткот. Тейсь кирькс, мельганзо омбоце...

Теряй кайсесь ды учось, зярдо Натуш лиси ведьстэнтъ ды
одс невтьсы чипаень валдосо артозь авань мазычинзэ.

Умок те ульнесь, вельть умок! Вейсэнъ эрямостост васен-
це эли омбоце иестэнтъ. Ды теке исяк! Ваясть сынъ дом-
кадомяк домка шкань отьмантень. А велявтсыть. Паро теяк

– кадовсть кизэнь се пси чиденть, се экшелямодонтъ, сеть уцяскадо пешксе минутатнеде, теке пиже-мазый панжиков-до, валдо ледстнемат.

Азгондят, теке лытагай!

...Валскесь ушодовсь кода свал. Эль кенерсь менелень валдось састыне-састыне совамо вальматнева ды пештямо аксялктнэнь, Теряй штавтыве лангстонзо кизэнь шождыне вельксэнтъ, чалгась кияксос ды ютась удалце кудонь вальманть икелев: мезе моли менельсэнтъ? Мезе полавтовсь? Тень топавтозь, ёрвалдызе шлямкайсэнтъ чаманзо, нардынзе кедензэ. Оршнесь ды лиссь, панжизе кудокенкшентъ, кудыкелев. Саинзе чаво ведратнень ды мартост калдор-кулдор валгсь кузтемпес.

– Шумбрат, маней валске, шумбрат, якстере вановт чилисема! – паро ёжосо, марямга мерсь Теряй атя, мизолдыця чилисеманть якстере сёлмонзо лангс ванозь. Валтнэнь ёвтазь, сыргась пирентъ трокс «викториянь» пандятнень юткова яннэванть лисьмалангов.

Таргась ведра ды жойсэ каизе эсензэ ведрас, амольдьясь омбоце. Кандтнинзе-совавтнинзе кудыкелев ды кудос ведте пешксе ведратнень. Банянь уштомс кандсь кавто керьметь эчке, беряньстэ лазнозь пенгть, нардынзе голландкасто куловтнень, пештинзе ведте банянь ачемениця покш кедьгентъ. Эзь стувто, варштась кардазовгак – нолдынзе пиринестэст

ды очкозост каясь товсюро саразтнэнь.

«Фу, okayники!» – мерсь эськанзо, валскень тевензэ прядозь, атясь. Сон арсекшнесь аламошкас новолемс кузтемпесэ тонадовозь эземнентень. Эзь кенере. Панжовсь пижесэ артозь кудыкельксэнь кенкшесь, ды кенкшалксонтъ лангс стясь Натуш.

– Тон курок? Стуворось учи, – верде атянзо лангс ванозь, мизолдозь, чевте пельвайгельть тердизе, прысонзо тейсь нулк-нулк, Теряень ярасамо, – кедеть илить стувто ёрвалдомс! Нардамокс нулатне, сапонесь – судот ало, неят.

– Паро, пельсекундань ютазь учок! – ахолдась кедьсэнзэ, серьгедсь Теряй пеедькшнезь, сиземань апак маря. Шлясь-нардась, ютась кузтемпе малас, каинзе пильгстэнзэ колошанзо, тонгсь кудонь карсемкайтъ ды совась кудос. «Мекс а улемс, а эрямс эрямонзо истямо вадря ёжосо? – кивчк ютась мелесь, Натушонь неезь. – Мекс а улемс истямокс течи, ванды, свал? Уле-арась истямо эрямо косяк?»

Учость Теряй атянь сывель марто пачалксинеть, велькссэ петезь кофе кечине ды Натушонь паневть капста марто чевте прякине. Сон нилинзе верьламбамодо таблетканзо, путсь икелензэ стуворонтъ лангс конёвлопа, мендизе чирева ды паромельсэ кундась путозтнень «тевс нолдамо», итьмамо.

Натуш эзь карма атянзо учома, ярасамонь кирданзо ютавызе совамодонзо икеле. Ней летьке тенстьсэ ахолясь тейтов, тенсесь киякс. Кирдемс ваньксчи – те, кода кортыть, верьсэнзэ. Теряй пеедькшнесь тень кувалма лангсонзо: «Тон

спиртсэ, спиртсэ ёзык стуворонть, киякс лазтнэньгак куш иезэнзэ весть! Ве эрий бактерия кудонтень а кадови...».

Теряй ярсавсь, шлинзе мельганзо пенчтнень-вакантнень, ёвтась азоравантень сюкпря ды лиссь кузтемпес. «Зяро валдо, кенярксчи ушосонть! Иля нузядо – амоляк!» – лип ютась пачканзо кеняркс раштый ёжо. Айгизе эземнень, ён улезэ озамс. Састыне, атакс, новольсь эйзэнзэ.

Те сонзэ, зярс ушосонть кизэ, зярс эзь кенере чалгамо сёксесь, вечкевикс тарказо. Ваны-арси, мезе тееви-моли мёнельсэнтъ, кона ёнов кирдить ки а капшиця ашо, лиясто качамо сэнь пондакш пельтне, мезе полавтовсь эсест ды шабратнень пиресэ. Кодат, мезде ансяк ледстнемат а содавтнесызь! Ледстнемат эйкакшпингедензэ, школасо ды лиясо-косо тонавтнема шкадонзо, кавксть урвакстозь эрямодонзо, аволь аламо эрязь иетнеде...

Озы, нолдасы прянзо, нежедьсы мештезэнзэ улонзо, конясынзе сельмензэ, ды мекшвелекс совить прязонзо, а учить тердема, арсематне, ледстнематне теде-тонадо. Кодаяк тензэ превс а саеви, мекс моданть лангсо таштавсь зняро авидечидень, мекс певтеме ламо ды визьксэнь апак сода кенгелить ды теить сонзэ, кенгелеманть, натой эрявикс коекс. Маряви, видечинтень озамо таркинеяк ломантне эзть кадо. Маряви тенст нулгодькс чинев кенгелемась медтеяк тантейкс. Те каня превс саеви? Пазонь кучовксокс ламот пряст ловить, тердить паронь, ансяк паронь тееме – раштыть кежть. Мекс истя, кодамояк логиканень а панжови!

Апак учо совась прызонзо мель: ютамс вирьга. Ледсь мелезэнзэ таркась, косо мелят увсо панжсть ды кецневтекш-низь Теряень валдо-сэнъ покш пря баягинетне. Совась вирень латонтъ алов. Яксесь, вешнесь се тарканть, арсесь вастовомс ёвксонь кондямо мазый сэнъ сельме балягинентъ марто, талай. Стяко. Эзь муеве. Се мелят ульнесь. Тедеде... Виде, ламот-мезть эрямосонтъ вастневить ансяк весть! Иля вешне, ютазентъ мекев а велявтсак. Тедеде кичиретнень ожосо артынзе шкерьгесь. Эрьвань эсензэ шказо.

Сизесь. Эртевсь вармадо умок сяворезь эчке пичес. Озась. Виресь чатьмонсь. Зяро эзь «стявтне» пилензэ, вейкеяк нармунь эседензэ эзь яволявто. Стувтокшнызе, сынъ «яволявтнить» эседест капшазь, кода ломантнеяк, ансяк одшка-стост. Ней... Ламот эйстэст уш чикуншка ёнот, ламот тона пелев кирдить ки. Саты, тесэнъ кизэст ютась. Сёксесь оно, кадык зярс кекшнезь, чары-тандавтни ожосонзо.

Ваннось перьканзо, кунсолось. Окойники кепедизе вановтонзо вельксканзо капшазь уиця вецана, чопода тюс пельт-нес. Сынст тунь а талновты ломантнень ютксо вейсэнъ эря-мост. Уить ды уить. Мезе тенст эряви, кинь вешнить?

Стясь ды теке янганть, чувтотнень-куракштнень юткова, апак эрязкале сыргась кудов.

Натуш латалдо ливтезь мокшнашка эземнентъ лангсо ваткесь модамартъ, ватксезтнень кайсесь вакссонзо ведте пешксе кастрюлянтень – анокстась ярсамс. Маряви, таго карми човорямо вечкевикс памшамопелензэ – сывелень консер-

ва марто томбазь-чевелязь модамарть. Оршазь авась шожда-сто, кизэкс, лавтовонзо ланга каязь човине коцтсто ковтыне, прызо штадо. Эно кода лиякс? Ушосонтъ гай умарьков!

– Косолить зярс? – прянь апак кепеде, тевензэ апак се-зе, музгордезь пшкадсь сыця мирденстэнь. Пельдензэ валонь апак учо поладызе теке вешкезь «кортамонзо»: – Азгондят, теке лытагай, тев а муят... Шукшторовтне апак чуролгавто, апак керсе... Монтемень теяк тетъ а тееви, учат, яла мон, яла мон кундазан...

– Шказо аволь пелевень... – верьга, казямо вайгельсэ мерсь Теряй, истя ёвтась валсонзо путызе тарказонзо аксуннинзэ, ваксканзо келейстэ эскелязь ютамсто.

– Тонь свал текесь, ансяк шканть таргсемс, – кепедизе прынзо тевстэнзэ, лотказевсь ватксемадояк, серьгедсь мельганзо, ильтизе келейстэ эскелязь ютыця Теряень.

Кузтемпес ды тосто кудос совамсто Теряй мериксэль: «Мон мезе, барщинас прям эцие? Лекстямс а максат! Эли батракокс сиведимик?». Кирдевсь, эзизе нерькста келензэ, оляс эзизе нолда пейтнень экшстэ. Астяко сеедьстэ ледстнесь Пушкинэнь: «Ды иля пелькстне чавола марто...».

Содась цёрась: гувкади толпандя, менельс кирнявтыть толкельтне. Пси карми. Теряй атя од шкастонзо, зяро иеть чадыведекс чудсть – а лововить, ловнокшнось кодамо-бути кулялопасто малав истямо «кортамонь» лувдо покш статья. Эйсэнзэ ледстневсть тувталтнэ, конат ветить истямо «важовсёвномавтомо» эрямонтень.

Те сёрмадовкстонть кадовсь Терентий Тимофеевичень мельс истямо тев. Кодат-бути мелявкст телень куншкат, ма-ней якшамо чистэ, ветякшнызь сонзэ тескень университетэ-нь педагогикань кафедрас.

Совась аволь покш нупальс. Икелензэ стуворост экишэ нувсесть конёвост велькссэ ниле-вете аволь од, аволь сыре-як ават – тонавтыцят. Кода кирдевсь превсэнзэ – эйкакшонь оймень содыцят.

– Шумбрачи! – арсесь совицясь аватненень, лангаст вано-втсонзо ютазь.

– Шумбрачи, шумбрачи! – гайгезевсть, пештизь нупа-ленть, вайгельть.

Аватнестэ, конёвост марто, Терентий Тимофеевичень ва-новтозо кепедевсь стенатнес. Эйсэст тердсть улемс истямокс, кодат сынь, инекс, модамасторонь келес содавикс педагог-тне: Жан-Жак Руссо, Константин Ушинский, Антон Мака-ренко, Василий Сухомлинский, умонь угрась, мейле мадья-рось Януш Корчак... Юткост – вейкеяк ава! «Ха! Те кода истя? Кода чарькодемс?» – абунгадсь сыцясь.

Инжесь нолдызе прянзо. Валгсь менельстэ масторов: пш-кадсь штадо пря, домкасто конёвост велькссэ «майсевиця» аватненень.

– Ёвтынк, энялдан: кить алкуксонь педагогтне? Цёратне, – Теряй невтсь кедьсэнзэ верев, – эли... аватне – тынь?

– Цёратне!!! – вете вайгельть апак тално, сеске серьгедсть вейсэ, пештизь жой вайгельсэст нупаленть. «Вай, авакай!

Сынст мезе, тонавтызь истя вейсэ, велувсо сеереме?» – ар-сезевсь «апак учонь инжесь».

Теряй аймельгадсь, эзь сода, мезе меремс. Теке гамадизь пря ланга. Каня эрси истя?

– Мекс энэ кафедрасонк, ванан, илядо покордаво, ансяк ават? Прявтонкак ава, – пшкадсь озадо аштиця тонавтыцят-ненень, лангозост вановтонзо кайсезь, ды теньсэ совавтынзе аёнчис, визделгавтынзе. Теевсь кашт.

Кода илязо уле, Теряй атя ловсь ды нейгак лови те сценанть-вастовоманть вельть ламодо кортыцякс. Сон корты васняк теде: эйкакшонть тряст-кастост кавто – цёраломань ды тейтерьава, тетя ды ава, текенекс, ветицякс юткост улезэ, малав свал, цёрась. Аволь чуросто Теряень содавтнизь Януш Корчаконь, ине педагогонть, валонзо: «Эйкакшт арасть – улеть ломанть».

Весе ушодови эйкакшпингстэ

Умок, пек умок редязь: ули тувтал ды ули эйстэнзэ лисиця поладкс. Те философиянь сыредеяк сыре коесь аравтни-вети тевтнень кода Моданть лангсо, истяня Менельде верьгаяк. Сонзэ виезэ редяви куш кодамо тевсэ-мелявкссо ды куш зардо. Те коенть эрямостонтъ а ёртсак, виензэ а тертясьть.

Косто, кодамо юрсто ушодовсь Натушонь обуцязо – эрямс лепштязь пружинакс? Мекс кежтне сонзэ кивчкаить эрва ёндо ды эрва мезде? Кодамо, косо тувталось – кирваземс,

теке сардыне, а истя, кодаяк чирьстэ ёвтазь валдо, а истя эс-кельдяmodo, озамодо-стяmodo эли лиядо-мезде? Мекс? Мекс эрва штелькскеденть, кона чеменев эскеяк а ашти, гувкаи, теке толкель, сёвномо?

Нетъ ашожда кевкстнематне а вестъ сакшность Ёгань Те-ряень превс, а вестъ сезнизь удоманзо. Онкстнесь, ловнось, кочкесь, мель путсь чарькодемс сынст эрва ёндо.

Сась мелезэнзэ Натушонь ёвтнемазо пиже шкадонзо. Сон-зэ ульнестъ колмо лелянзо. Меельгаст кемнилее иень ютазь авазо кандсь тейтерне. Очконардавксенть лемдекшнине На-тальнекс. Кассь «покольнезэ» покштнень ютксо вейкине, те-тявтомо эйкакшкекс – някинекс. Кудосонтъ мартонзо эйденъ кельсэ кортниця-налксиця ялгине арасель. Ськамонзоль.

Мезе те вейкинесь, кодамокс кепети-касы, Наталень ава-зо, кода лелянзояк, эзть арсе. Эзть сода, превть эзть яжа иль-ведькстнэде, конатнеде аволь аламо лиснить вейкинетнень важдамсто-трямсто.

Васенцесь эйстэст – кольневтемась. Зярдо кудосонтъ, нев-темга, колмо эйкакшт, тенст эрявиксэсь (налкшкетне, яrsa-мопельтне, оршамотне...) явови вейкетъстэ – колмов, зяр-до вейке – весе, петнявксень пес, понгить сонензэ: мезеяк тантейне, вечкевикс, мазыйне налкшке... Понги тензэ, теке-некс, седе ламо, аволь кодамояк колмоце эли нилеце пелькс-ке. Мезе веши, кодамо питней, чуросто вастневиця илязо уле, – муема ды путома икелензэ. «Покольнентень» – ве-се. Эрва кода савтнить тензэ! Истя кемекстави пакшанть

превсэ-седейсэ мелесь: «Весемеде покшось, эрявиксэсь, вивесь, вечкевиксэсь модамасторсонть – мон! Вейкень пес, мезе перькан, – васняк монень! Лиятнеде, кить перькат, а мезть мелявтомс, стувтыть. Прявтось кудосонть – мон».

Тевтнень, конат теевильть пакшантень, тейсь тарказонзо авазо, эзь кармавто тяканзо, сыргози, тарканзо ацамо, эзь тонавто лиянь мелень ваномо. Эзь чарькоде авась, три истя эсь прянь вечкиця, эрва челькинеде кежиявтниця, ордакш, на той аксун ломань. «Кода а вечкемс эсь умарнеть!» – марсевсь кургстонзо, яла идесь эсь прынзо. Эзь арсе – колы тень эйсэ умонь пингень превспутоманть: «Вечкть эйкакшот удомстонзо эли зярс кельги путомс эзементь трокс». ...

Ламот, секень вант, се шкань эрицятнеде эзизь сода те валмеревксэнтъкак: «Вейке эйкакш – а эйкакш, кавто эйкакшт – пельэйкакш, колмо эйкакшт – эйкакш». Неень аватнедеяк, маряви, аволь ламо кить марсизь неть сырнень валтнэнь, содавлизьгак, «някат» авольть чачтне, теевельть истя, кода кортави валмеревксэнтъ.

Мезес пачти эйкакшонь сокор вечкемась, Теряйнень шабрань кедьстэ превть кевкстнемс эзь савкшно. Сонензэ содавикс вейкиненъ важдамось. Покш ды веженсь цёранзо ютксо – кавксо иеть. Лиссь истя: кавксть кавксо, иеть нинзэ марто трясть-кастсть кавто съкамонькай цёрынеть. Васенцентъ школав туема шкастонзо – уш покш цёрынель – чачсь ялакскезэ Вежай, теяк, ловт, кассь ялгавтомо. Видяй лелянстэнь уш кавксо, сонензэ... Ве кель-вал муемс зняро иень авей-

кетьчисэ ашождыне. Сестэ Теряйнень эзь чарькодевкшне, одоль, мезе те улемс тетякс содыль аламо, превскак эзь сакшно, кодат тешкскеть кады обуцязост ялгиневтеме касомась, кадык ланга-верьга – кольневтнематне.

Эскелясть иеть... Эрьвань апак неяво, састыне кассь эсензэ, кодамо илязо уле, корозо. Кодат челькеть сынь, неть явотыця иетне, кадсть уцясказост, Теряй содасы...

Кавксо иеть... Натальне сась модамасторонть лангс веженсь лелянзо чачомадо мейле кемнилее иень ютазь! Юткось покш. Шкатнеяк лиятальть. Секс тейтернесь кенерсь таштамо съкамонькаень обуцянь ёнкстнэде ламоксть ламо.

Теяк: Наталень аванзо коряс Теряй ламодо од, сюпав, кода тетя, содамочисэ, ламо тонавтнесь, ловнось, сёрмадомань вечкиця. Наталень авазо ульнесь сёрмас а содыця велень ломань. Секс кольневтсь «левкскензэ» кода ды мейсэ маштсь, буень апак сода. Теке марто, тиринезэ кадсь тензэ питнейде-як питней казне – тевень вечкема. Тевтне, асатыкстне войнань ды мельганзо иетнестэ прядо велькскальть. Теяк, кудосонт колмо цёрат. Кие карми лездамо аванстэнь кудонь, кардазонь ды пирень тевтнесэ? А эйкакшост ваномо кие карми?

Конец ознакомительного фрагмента.

Текст предоставлен ООО «ЛитРес».

Прочитайте эту книгу целиком, [купив полную легальную версию](#) на ЛитРес.

Безопасно оплатить книгу можно банковской картой Visa, MasterCard, Maestro, со счета мобильного телефона, с платежного терминала, в салоне МТС или Связной, через PayPal, WebMoney, Яндекс.Деньги, QIWI Кошелек, бонусными картами или другим удобным Вам способом.